

四庫全書

集部

欽定四庫全書

集部

東雅堂昌黎集註

遺文
本傳

詳校官通政使_臣夢吉

檢討_臣何思鈞覆勘

總校官檢討_臣何思鈞

校對官主事_臣陳文樞

謄錄監生_臣施華

欽定四庫全書

東雅堂韓昌黎集註

提要

臣等謹案東雅堂韓昌黎集註四十卷不著撰人名氏惟卷末各有東吳徐氏刻梓家塾小印考陳景雲韓集點勘書後曰近代吳中徐氏東雅堂刊韓集用宋末廖瑩中世綵堂本其注采建安魏仲舉五百家

註本為多間有引他書者僅十之三復刪節
朱子單行考異散入各條下皆出瑩中手也
瑩中為賈似道館客事見宋史似道傳徐氏
刊此本不著其由來殆深鄙瑩中為人故削
其名氏併開板年月邪云云今考此本前列
重校凡例九條內稱廟諱一條確為宋人之
語景雲之說為可信知此本為瑩中註也景
雲又自註此文曰東雅堂主人徐時泰萬歷

中進士官工部郎中今考明進士題名碑萬
厯甲戌科有徐時泰長洲人蓋即其人矣乾
隆四十六年三月恭校上

總纂官

臣紀昀
臣陸錫熊
臣孫士毅

總校官
臣陸費墀

重校昌黎集凡例

是集 慶元間魏仲舉刊五百家註引洪興祖樊汝

霖孫汝聽韓醇劉崧祝充蔡元定諸家註文

洪辨證
樊諧註

孫韓劉全解
祝音義蔡補註

未免冗複而方崧卿舉正朱子校本

攷異却未附入讀者病之今以朱子校本攷異為主
而刪取諸家要語附註其下庶讀是書者開卷瞭然
今舉凡例于左

一朱子攷異凡例見于文集序首並仍其舊

一閣京杭蜀石本異同已見朱子攷異凡例今更加讎校是正頗多觀者當自知之

一註引經子史等事則書于攷異之上釋音則附其下

一小圈下今按云云者並是攷異全文

一註引經子史書傳事為證者則入如集中有關繫時政及公卿拜罷月日更博採新舊史唐登科記附益之

一舊註引某氏云者今做朱子離騷集註例皆刪去惟攷異下有糾方之繆者則存之如復志賦誰無施而有獲所辨之類是也

一先儒議論有關繫者隨所聞見增入如閔已賦固哲人之細事今東坡顏樂亭記嘗有評議元和聖德詩婉婉弱子赤立偃僂南軒所議之類是也

一正文或有疑字並依攷異文从口如藍田縣丞

廳壁記再進再屈口人之類是也

一皇朝廟諱諸本多易本字如貞元作正元之類非臨文不諱之義徒失古意今例但空本字點畫若唐諱如以丙為景以民為人之類却存古不改

一攷異於正文本字或一字或二字並提起今例如本字在句末即入註脚不復重出句讀中或一兩字各有攷異並總附於一句之下

昌黎先生集序

朱子云此集今世本多不同惟近歲南安軍所刊方崧卿校定本號為精善別有樂正十卷論其所以去取之意又它本之所無也然其去取多以祥符杭本嘉祐蜀本及李謝所據館閣本為定而尤尊館閣本雖有謬誤往往曲從它本雖善亦棄不錄至於舉正則又例多而詞寡覽者或頗不能曉知故今輒因其書更為校定悉考衆本之同異而一以文勢義理及它書之可證驗者決之苟是矣則雖民間近出小木不敢違有所未安則雖官本古本石本不敢信又各詳著其所以然者以為考異十卷庶幾去取之未善者覽者得以參伍而筆削焉。云序只云目為昌黎先生集諸本亦多無文字者今以之。後凡以方氏者不復論所不同者乃

欽定四庫全書

東雅堂昌黎集註
序

著

之

門人李漢編

蜀本作朝議郎行尚書屯田員外郎
史館修撰上柱國賜緋魚袋李漢編

今本或有并

序二字非是

文者貫道之器也不深於斯道有至焉者不也易繇爻

象

繇音宙占
辭名也

春秋書事詩詠歌書禮剔其偽皆深矣乎

秦漢已前其氣渾然迨乎司馬遷相如董生揚雄劉向

之徒尤所謂傑然者也至後漢曹魏氣象萎爾司馬氏

已來規範蕩悉謂易已下為古文剽掠潛竊為工耳文

與道茶塞固然莫知也先生生於大歷戊申幼孤隨兄

播遷韶嶺兄卒鞠於嫂氏辛勤來歸

求或作非是

自知讀書

為文日記數千百言比壯經書通念曉析酷排釋氏諸

百子皆搜抉無隱

或無皆字

汗瀾卓踔翕泣澄深

左太冲吳都賦云泓澄翕

漆郭璞江賦云澳混國注於更切注音玄或作沚非是

翕

詭然而蛟龍翔蔚然而

虎鳳躍鏘然而韶鈞鳴

方从杭蜀本作發今按二字兩通但作鳴則句響而字穩耳

故今定从諸本而時著方本所以以備考後皆放此

日光玉潔周情孔思千態

萬貌卒澤於道德仁義炳如也洞視萬古愍惻當世遂

大拯頽風教人自為

左氏成公二年其自為謀也則過失為下偏切

時人始

而驚中而笑且排先生益堅終而翕然隨以定嗚呼先

生於文摧陷廓清之功比於武事

閩本作士非是

可謂雄偉不

常者矣

常方从抗本作賞云取漢書功蓋天下者不賞之語今按不賞乃劉徹教韓信背叛之語而

唐太宗亦嘗自言武德末年實有功高不賞之懼施之於此既不相似且非臣子所宜言者李亦未必敢取以為用也當从長慶四年冬先生歿門人隴西李漢

或無隴西

二字辱知最厚且親遂收拾遺文無所失墜

左傳國語多用失墜字或

作墜失或無失字者皆非

得賦四古詩二百一十聯句十一律詩一

百六十雜著六十五書啓序九十六哀詞祭文三十九

碑誌七十六筆硯鯉魚文三表狀五十二摠七百

或作七百

一十六或作七百三十八方氏考其數皆不合而姑從
闕本杭本以為唐本舊如此既非文義所繫今亦不能

深考

并目錄合為四十一卷目為昌黎先生集傳於代又

有注論語十卷傳學者順宗實錄五卷列於史書不在
集中先生諱愈字退之官至吏部侍郎餘在國史本傳

昌黎集序說

宋景文公云柳柳州為文或取前人陳語用之不
及韓吏部卓然不丐於古而一出諸已

蘇明允上歐陽書云孟子之文語約而意深不為
嶮刻斬絕之言而其鋒不可犯韓子之文如長江
大河渾浩流轉魚鼈蛟龍萬怪遑惑而抑絕蔽掩
不使自露而人望見其淵然之光蒼然之色亦自
畏避不敢迫視

東坡云杜詩韓文顏書左史皆集大成也又云唐之古文自韓愈始其後學韓而不至者為皇甫湜學皇甫湜而不至者為孫樵自樵以降無足觀矣山谷與王觀復書云杜子美到夔州後詩韓退之自潮州還朝後文章皆不煩繩削而自合矣又云老杜作詩退之作文無一字無來處蓋後人讀書少故謂韓杜自作此語耳又答洪駒父云諸文皆好但少古人繩墨耳可更熟讀司馬子長韓退之

文章

秦少游云探道德之理述性命之情發天人之奧
明死生之變此論理之文如列禦寇莊周之作是
也別黑白陰陽要其歸宿決其嫌疑此論事之文
如蘇秦張儀之所作是也考同異次舊聞不虛美
不隱惡人以為實錄此叙事之文如司馬遷班固
之所作是也原本山川極命草木比物屬事駭耳
目變心意此託詞之文如屈原宋玉之所作是也

鉤莊列之微挾蘇張之辯撫遷固之實獵屈宋之英本之以詩書折之以孔氏此成體之文如韓愈之所作是也蓋前之作者多矣而莫有備於愈後之作者亦多矣而無以加於愈故曰總而論之未有如韓愈者也

陳後山云杜之詩法韓之文法也詩文各有體韓以文為詩杜以詩為文故不工耳

李方叔云東坡教人讀戰國策學說利害讀賈誼

晁錯趙充國章疏學論事讀莊子學論理性又須
熟讀論語孟子檀弓要志趣正當讀韓柳令記得
數百篇要知作文體面

昌黎集序說

欽定四庫全書

東雅堂昌黎集遺文

聯句

有所思聯句

此下三聯句
見孟東野集

相思繞我心
日夕千萬重
年光坐晚晚
春淚銷顏容
臺鏡晦舊暉
庭草滋新茸
望天山上石
別劍水中龍

愈

遣興聯句

說見上

我心隨月光
寫君庭中央
月光有時晦
我心安所忘

愈
常恐金石契斷為相思腸平平生無百歲岐路有四

方愈四方各異俗適異非所將郊驚蹄顧挫秣逸翮遺

稻梁愈時危抱獨沉道泰懷同翔郊獨居久寂默相顧

聊慨慷愈慨慷丈夫志可以耀鋒鏖郊遽寧知卷舒孔

顏識行藏愈朗鑒諒不遠佩蘭永芬芳郊苟無夫子聽

誰使知音揚愈

贈劍客李園聯句

上同

天地有靈術得之者唯君郊築爐地區外積火燒氛氲

愈
照海鑠幽怪滿空歎異氛郊山磨電弈弈水淬龍蛭

蛭愈太一裝以寶列仙篆其文郊可用懾百神豈唯壯

三軍愈有時幽匣吟忽似深潭聞郊風胡久已死此劍

將誰分愈行當獻天子然後致殊勲郊宜如豐城下空

有斗間雲愈

遺詩

同竇韋

年執中

尋劉尊師不遇

此詩得於五竇
聯珠集公時任

都官外郎同洛陽令竇年河南令韋執中以
訪之元和五年也詩以同尋師為韻人各一

首洪氏年譜亦見

秦客何年駐仙源此地深還隨躡鳬騎來訪馭風襟院
閉青霞入松高老鶴尋猶疑隱形坐敢起竊桃心

春雪

今按此詩得於文苑英華其後即以正集中春雪詩首句云新年都未有芳華者系之疑亦公作也已上並方本所載諸本所無者今悉存之諸本更有遺文一卷方獨取贈族姪嘲軒睡三篇餘並不錄今並附見于後其可疑者亦但存其目而不載其文云

片片驅鴻急紛紛逐吹斜到江還作水著樹漸成花越
喜飛排瘴胡愁厚蓋砂兼雲封洞口助月照天涯暝見

迷巢鳥朝逢失輶車呈豐盡相賀寧止力耕家

贈族姪

上或有
徐州字

我年十八九壯氣起曾中作書獻雲闕辭家逐秋蓬歲
時易遷次身命多厄窮一名雖云就片祿不足充今者
復何事卑棲寄徐戎蕭條資用盡瀆落門巷空朝眠未
能起遠懷方鬱悰擊門者誰子問言乃吾宗自云有奇
術探妙知天工既往悵何及將來喜還通期吾語非佞
當為佐時雍

嘲鼾睡

李希聲家有退之遺詩數十篇希聲云皆非也獨嘲鼾二篇似之錄于末

澹師晝睡時聲氣一何猥頑颺吹脂肪坑谷相嵬磊雄

哮乍咽絕每發壯益倍有如阿鼻尸長喚忍衆罪馬牛

驚不食百鬼聚相待木枕十字裂鏡面生痂瘡

痂音肥瘡音濕

痂瘡腫病也

鐵佛聞皺眉石人戰搖腿孰云天地仁吾欲責

真宰幽尋虱搜耳猛作濤翻海太陽不忍明飛御皆情

怠乍如彭與黥呼冤受菹醢又如園中虎號瘡兼吼餒

雖令伶倫吹苦韻難可改雖令巫咸招鬼爽難復在何

山有靈藥療此願與採

澹公坐卧時長睡無不穩吾嘗聞其聲深慮五藏損黃

河弄漬瀑梗澀連拙鮫南帝初奮槌一竅洩混沌

莊子應帝

玉篇南海之帝儵北海之帝忽中央之帝混沌相與甚善儵與忽謀報混沌之德曰人皆有七竅以視聽食息此獨無有嘗試鑿之曰鑿一竅七日而混沌死迥然忽長引萬丈不可忖謂言

絕於斯繼出方袞袞幽幽寸喉中草木森莽萑

莽音本萑音忖

草木叢生也

盜賊雖狡獪亡竟敢窺閭瀉蒙總合雜詭譎騁

戾狠乍如鬪呶呶忽若怨慄慄賦形苦不同無路尋根

金匱要略卷之八
遺文
本何能埋其源惟有土一番

畫月

玉盆不磨著泥土青天孔出白石補
兔入臼藏蛙縮肚桂樹枯株女閉戶
陰為陽羞固自古嗟汝下民或敢侮戲
謔盜視汝目瞽

贈張徐州莫辭酒

莫辭酒此會固難同請看工女機上帛
半作軍人旗上紅莫辭酒誰為君王之
瓜牙春雷三月不作響戰士豈

得來還家

辭唱歌

諸本注云此篇恐非公作今姑存之

抑逼教唱歌不解看豔詞坐中把酒人豈有歡樂姿幸
有伶者婦腰身如柳枝但令送君酒如醉如愁癡聲自
肉中出使人能遠隨復遣慳悵者贈金不皺眉豈有長
直夫喉中聲雄雌君心豈無恥君豈是女兒君教發直
言大聲無休時君教哭古恨不肯復吞悲乍可阻君意
豔歌難可為

知音者誠希

古詩不悲歌者
苦但傷知音希

知音者誠希念子不能別行行天未曉携手踏明月

酬藍田崔丞立之詠雪見寄

京城數尺雪寒氣倍常年
泯泯都無地茫茫豈是天
崩奔驚亂射揮霍訝相纏
不覺侵堂陛方應折屋椽
出門愁落道上馬恐平韉
朝鼓矜凌起山齋酩酊眠
吾方嗟此役君乃詠其妍
水玉清顏隔波濤盛句傳
朝飧思共飯夜宿憶同羣
舉目無非白雄文乃獨玄

潭州泊船呈諸公

夜寒眠半覺鼓笛開嘈嘈閨浪春樓堞驚風破竹篙主人看使範客子讀離騷聞道松醪賤何須恡錯刀

飲城南道邊古墓上逢中丞過贈禮部衛員外

少室張道士

中丞謂
裴度也

偶上城南土骨堆共傾春酒三五盃為逢桃樹相料理
料音聊不覺中丞喝道來

池上絮

池上無風有落暉楊花晴後自飛飛為將纖質凌清鏡
濕却無窮不得歸

記

監軍新竹亭記

按此天恐非公作今刪去

書

答侯生問論語書

公作論語傳未成而歿見於張籍祭詩辨於洪慶善之說

者甚明今世所傳如宰予晝寢以晝作晝子在齊聞韶三月不知肉味以三月作音浴乎沂以浴作浴子在回何敢死以死作先雖此鄙淺然為伊川之學者皆取之

愈白侯生足下所示論語問甚善聖人踐形之說孟子
詳於其書當終始究之若萬物皆備於我反身而誠是
也苟有偽焉則萬物不備矣踐形之道無他誠是也足
下謂賢者不能踐形非也賢者非不能踐形能而不備
耳形言其備也所謂具體而微是也充實之謂美充實
而有光輝之謂大充實則具體未大則微故或去聖一
閒或得其一體皆踐形而未備者唯反身而誠則能踐
形之備者耳愈昔注解其書而不敢過求其意取聖人

之吉而合之則足以信後生輩耳此說甚為穩當切更
思之愈白

墓誌

相州刺史御史中丞田公故夫人魏氏墓誌銘

下或有注并序字 今按此篇不類公它文
目云元和八年則又非少作其非公作無疑
今刪去

啓

皇帝即位賀宰相啓

愈啓伏見冊命皇帝以閏月三日嗣臨大位以主神人
含生之類孰不蒙賴相公翼亮聖明大慶資始伏惟永
永與國同休愈下情不勝慶躍限以所守不獲隨例拜
賀謹差某奉啓不宣謹啓

狀

奏汴州得嘉禾嘉瓜狀

方本有之以附嘲新睡
之復云此篇見文苑英

華蓋為董晉作董

晉行狀亦可攷

右謹按符瑞圖王者德至於地則嘉禾生伏惟皇帝陛下

下道合天地恩霑動植邇無不協遠無不賓神人以和
風雨咸若前件嘉禾等或兩根並植一穗連房或延蔓
數榮異實共蒂既叶和同之慶又標豐稔之祥感自皇
恩微莖何極於造化親逢嘉瑞小臣喜過於休明無任云云

皇帝即位賀諸道狀

伏見勅命皇帝以閏正月三日嗣臨寶位海內惟新凡
在臣庶不勝慶幸惟俯同下情未由拜賀但增馳戀謹

奉狀不宣某再拜

或無此
三字

皇帝即位降赦賀觀察使狀

二月五日恩赦今月二十四日卯時到州當時集百官

僧道百姓宣示訖聖上以繼明之初垂惟新之澤曲成

不遺於萬物大賚遂延於四海寰宇斯泰品類皆蘇渥

恩普霑遠近同慶

蘇渥或乙此二字非是

愈以藩條有制拜賀無

由不勝欣抃之至謹差萍鄉縣丞李某奉狀陳賀

某或作於

潮州謝孔大夫狀

此篇見洪氏年譜方氏增考云公既南行家亦隨逐二月

二日已過商州之南而此狀言七月二十七日
牒則八月作也不知其家何故猶未至潮

又姪孫湘亦從公而南故宿曾江口有示湘詩而過始興江口詩謂目前百口還相逐與狀言妻子孫姪未到者皆不相應此狀恐妄也今按公之到郡既不見年月之實則此狀無由可考方氏引曾江始興二詩以證此狀之妄蓋亦有理但恐或是已過始興留家在後而獨先到郡亦不可知但其狀詞頗類袁州申使狀則又未有以必見其妄故今且存之亦闕疑之意也

伏奉七月二十七日牒以愈貶授刺史特加優禮以州小俸薄慮有闕乏每月別給錢五十千以送使錢充者開緘捧讀驚榮交至顧已量分慚懼益深欲致辭為讓

則乖伏屬之禮承命苟貪又非循省之道進退反側無以自寧其妻子男女并孤遺孫姪奴婢等尚未到官窮州使賓罕至身衣口食絹米足充過此以往實無所用積之於室非廉者所為受之於官名且不正恃蒙眷待輒此披陳

疏

憲宗崩慰諸道疏

愈言上天降禍大行皇帝奄棄萬國伏惟攀慕永痛哀

金史卷一百一十五
道文
感難勝某承詔不任號絕限以官守拜慰末由伏增惶
戀謹差某奉疏不宣韓愈再拜

題名

長安慈恩塔題名

已下並方
本所載

韓愈退之李翱習之孟郊東野柳宗元子厚石洪濬川
同登

洛北惠林寺題名

韓愈李景興侯喜尉遲汾貞元十七年七月二十二日

魚于溫洛宿此而歸昌黎韓愈書

謁少室李渤題名

愈同樊宗師盧仝謁少室李拾遺

福先塔寺題名

處士石洪濬川吏部員外王仲舒弘中水部員外鄭楚
相叔教洛陽縣令潘宿陽乾明國子博士韓愈退之前
試左武衛曹李演廣文前杭州錢塘縣尉鄭絃文明
元和三年十月九日同遊

嵩山天封宮題名

歐公跋
語附

元和四年三月二十六日與著作佐郎樊宗師處士盧
仝自洛中至少室謁李徵君渤樊次玉泉寺疾作歸明
日遂與李盧道士韋濛僧榮並少室而東抵衆寺上太
室中峯宿封禪壇下石室遂自龍泉寺釣龍潭水遇雷
明日觀啓母石入此觀與道士趙玄遇乃歸閏月三日
國子博士韓愈題

歐公集古跋尾云右韓退之題名二皆在洛陽其

一在嵩山天封宮石柱上刻之記龍潭遇雷事天
聖中余為西京留守推官與梅聖俞遊嵩山入天
封宮徘徊柱下而去遂登山頂之武后封禪處有
石記戒人遊龍潭者毋語笑以黷神龍龍怒則有
雷恐因念退之記遇雷意其有所誠也其一在福
先寺塔下當時所見墨蹟不知其後何人模刻于
石也

迂杜兼題名

河南尹水陸運使杜蕪尚書都官員外郎韓愈水陸運判官洛陽縣尉李宗閔水陸運判官伊闕縣尉牛僧孺前同州韓城縣尉鄭伯義元和四年九月二十二日大尹給事奉詔祠濟瀆回愈與二判官於此迎候遂陪遊宿愈題

華嶽題名

此文刻於金天祠石闕晉人嘗集華嶽題名自唐開元至後唐清泰錄為

十卷此文雖未必盡出公手然筆削之嚴要非公不可故錄之

淮西宣慰處置使門下侍郎平章事裴度副使刑部侍

郎兼御史大夫馬總行軍司馬太子右庶子兼御史中丞韓愈判官司勲員外郎兼侍御史李正封都官員外郎兼侍御史馮宿掌書記禮部員外郎兼侍御史李宗閔都知兵馬使左驍衛將軍威遠軍使兼御史大夫李文悅左廂都押衙兼都虞候左衛將軍兼御史中丞密國公高承簡元和十一年八月丞相奉詔平淮右八日東過華陰禮于嶽廟總等八人實備將佐以從

欽定四庫全書

遺文

東雅堂昌黎集遺文

朱子校昌黎集傳

新書本傳

宋景文公

今以李翱所撰行狀皇甫湜所撰墓誌神道碑
舊史本傳資治通鑑洪興祖所撰年譜程俱所
撰歷官記方崧卿增攷年譜考其同異詳略附
注本文之下以見公之行事本末而文之已見
於集者不復載云

韓愈字退之鄧州南陽人七世祖茂有功於後魏封安

定王父仲卿為武昌令有美政既去縣人刻石頌德終

祕書郎

李白作文公父仲卿去思碑云南陽人而公常
自稱昌黎李翱作公行狀亦云昌黎某人皇甫

欽定四庫全書

本傳

漢作墓志不言鄉里又作神道碑乃云上世嘗居南陽
又隸延州之武陽而舊史亦但云昌黎某今按新史蓋
因李碑而加鄧州二字也然考漢書地理志有兩南陽
其一河內脩武即左傳所謂晉啓南陽也其一南陽堵
陽即荊州之南陽郡字與赭同在唐屬鄧州者也元和
姓纂唐書世系表有兩韓氏其一漢弓高侯顏當玄孫
審避亂居南陽郡之赭陽九世孫河東太守衍生河東
太守純純四世孫安之晉員外郎二子潛恬隨司馬休
之入後魏為玄菟太守二子都偃偃生後魏中郎顏頴
生播徙昌黎棘城其一則顏當裔孫尋為後漢隴西太
守世居潁川生司空稜後徙安定武安至後魏有常山
太守武安成侯耆徙居九門生尚書令征南大將軍安
定相王茂茂生均均生駿駿生仁泰仁泰生獻素獻素
生仲卿仲卿生會愈而中間嘗徙陳留以此而推則公
固潁川之族尋稜之後而不得承審之系矣而洪興祖
所撰年譜但以審之後世嘗徙昌黎遼附新史之說獨

以諸陽為均州小有不同耳及其再考二書而見公世系之實則遂諱匿不敢復著仲卿會愈之名而直以為不可考今固不得而據也唯方崧卿增考引董道說以為審乃韓瑗韓休之祖而公自出於尋後與二書合其論南陽則又云今孟懷州皆春秋南陽之地自漢至隋二州皆屬河內郡唐顯慶中始以孟州隸河南府建中中乃以河南之四縣入河陽三城使其後又改為孟州今河內有河陽縣韓氏世居之故公每自言歸河陽省墳墓而女挈之銘亦曰歸骨于河南之河陽韓氏墓張籍祭公詩亦云舊塋盟津北則知公為河內之南陽人其說獨為得之公詩所謂舊籍在東都我家本澠救則必以地近而後嘗徙居耳但據此則公與昌黎之韓異派而每以自稱則又有不可曉者豈是時昌黎之族頗盛故隨稱之亦若所謂言劉忠出彭城言李悉出隴西者邪然設使公派果出昌黎也則其去諸陽已歷數世其後又屢遷徙不應舍其近世所居之土而遠指鄆州為鄉里也方又引孔武仲之說亦同董氏而

王銍以為公生於河中之永樂今永樂猶有韓文卿則其說為已詳蓋其世系雖有不可知者然南陽之為河內脩武則無可疑者而新史洪譜之誤斷可識矣

愈生三歲而孤隨伯兄會貶

官嶺表會卒嫂鄭鞠之

李漢序云先生生於大歷三年戊申三歲而孤見祭嫂文及乳

母誌會事見盧東美誌洪譜云盧志所謂宗兄乃大宗小宗之宗舊史以為從父兄誤矣又云舊史大歷十二年夏五月起居舍人韓會坐元載貶官柳宗元先友記云會善清言有文章名最高以故多謗會既卒公携家北歸葬會河陽建中貞元間復避地於江南韓氏有別業在宣城因就食焉見歐陽詹哀詞復志賦祭嫂及老成文示

愈自知讀書日記數千百言比長盡能通六經百

家學

行狀云讀書能記它生之所習墓誌云先生七歲好學言出成文今按復志賦云值中原之有事

分將就食於江之南始專專於講習兮非古訓為擢進

士第

洪譜云貞元二年丙寅公年十九始至京師見祭

老成文歐陽哀詞答崔立之書五年己巳有上賈
滑州書六年庚午有河中府連理木頌七年辛未有送
齊驛序八年壬申登進士第時年二十五見上邢君牙
書唐科名記云貞元八年陸贄主司試明水賦御溝新
柳詩公名在榜中見與陸員外書舊史云大歷貞元間
大士多尚古學而獨孤及梁肅最稱淵奧從其徒游
銳意鑽仰欲自振於一代洎舉進士投文於公卿間故
相鄭餘慶頗為延譽由是知名是年有爭臣論九年癸
酉博學宏詞試太清宮觀紫極舞賦顏子不貳過論見
上考功崔虞部書及與韋舍人書十年甲戌有省試學
生代齊郎議方攷此議當繫十一年試宏詞下未詳是
否洪譜又云是年嘗歸河陽省墳墓見祭老成文有贈
張童子序十一年乙亥又試宏詞見答崔立之書有三

上宰相書皆不報是年去京師過潼關有感二鳥賦既歸河陽有畫記遂自河陽如東都有祭田橫文今按

八年以後此年以前又嘗遊鳳翔以書抵邢君牙不得意去有岐山詩決程皆定為此年六月誤矣會董

晉為宣武節度使表署觀察推官晉卒愈從喪出不四

日汴軍亂乃去依武寧節度使張建封建封辟府推官

操行堅正鯁言無所忌

董晉行狀云十二年七月晉拜宣武節度使受命遂行韓愈實

從公行狀云董公辟公以行得試秘書省校書郎為觀察推官墓誌云先生三十有一而仕神道碑云十四年

用進士從董晉平汴州推官舊史作巡官洪譜云二狀載公入汴在十二年丙子與史合誌碑所記皆後二

年殊不可曉豈今年辟公以行至十四年始有成名邪亦不應如是之緩也方攷蜀本與本無三十一而仕之

文但云歷官二十有七年爾然自公卒之年逆數之亦當以十四年三十一歲為歷官之始故公入汴雖在十二年然水門記十四年正月作石本猶但稱攝節度掌書記前進士韓愈是辟命猶未下也計必是年辟命乃下故碑誌之言如此不當以命下之緩為疑也今按公入汴之年洪方得之碑誌所計年數若以命下之日言之亦未為失但云十四年從董晉平汴州則誤矣又送俱文珍序亦在十三年安得言十四年乃入汴乎要當以公之自言及二狀二史通鑑為正特正狂躁其攷之或有未審不足據也舊史之作巡官則程記已辨其非矣洪譜又云十三年丁丑公在汴有復志賦送汴州監軍俱文珍序十四年戊寅公在汴有天星詩水門記楊燕奇碑十五年已卯董晉行狀云二月三日丞相薨公從喪行四日而汴州亂有汴州亂詩歷官記云汴軍亂愈家在園中尋得脫下汴東趨彭城愈從喪至洛還盟津度汜水出陳許間以二月暮抵徐州節度使張建封居之于符離雉上及秋將辭去建封

奏為節度推官試協律郎至冬建封使愈朝正于京師
見歐陽哀詞是年有此日足可惜汴泗交流詩答李翱
書上建封書論晨八夜歸事後又有揀擊毬書賀白兔
狀徐泗蒙節度掌書記廳石記崔翰墓誌十六年庚辰
春公朝正回徐有歸彭城詩夏去徐西居於洛陽見孟
東野書及題下邳李生壁按公與東野書欲至秋辭去
而題李生壁在五月十四日則不待至秋而已去徐矣
舊史亦云公發言真率無所畏避豈竟以此不合雖建
封之知已亦不能容邪公既去徐而建封卒翌日徐軍
亂見白樂天哀二良文在洛有與衛中行書冬公如京
師

調四門博士

洪譜云十七年辛巳公在京師從調選
三月東還見與盧汝州薦侯喜狀將歸

有贈孟東野房蜀客詩是年有送李愿歸盤谷序李楚
金墓誌公自去年冬參調竟無所成而歸今年冬再往
十八年壬午春始有四門博士之授為博士日嘗指告
歸洛因遊華山即答張徹詩所謂洛邑得休告華山窮

絕陘者也李肇國史補云愈好奇與客登華山絕峯度
不可返發狂慟哭為書與家人別華陰令百計取之乃
下沈顏作聲書以為肇妄載豈有賢者輕命如此考公
詩則知國史補乃實錄也是年有送陸欽州序上巳日
燕太學聽彈琴序與崔羣
書施士丐墓誌馬鼎行狀遷監察御史上疏極論宮市

德宗怒貶陽山令有愛在民民生子多以其姓字之

洪譜

云十九年癸未公年三十六自博士拜監察御史時有
齒落哭楊兵曹陸欽州慘詩及與陳京給事書禘祫議
論權停選舉狀苗氏墓誌又上李實書稱前守四門博
士時已罷博士未受御史之命書云愈來京師於今十
五年蓋公自貞元五年從鄭滑間復東京師至此十五
年矣實錄於實抵之不餘力而此書乃盛稱其所長此
又不可曉也方攷唐制凡居官以四考為滿公在官踰
年耳不知何故而罷罷而復遷行狀墓碑皆只言選授

四門博士遷監察御史而此書稱前官又以文投贄於李實似若不得已者是固嘗罷博士而別遷也是歲七月公猶任博士乞免停選狀謂臣雖非朝官月受俸錢可以考也罷免之由不可詳究然恐不至於媚實以求進也或云德宗末年不任宰相所取信者李實韋執誼輩耳公益未免於屈身以伸道也然公天旱人飢狀專指李實而言其修實錄又於實一辭不袒獨於此書抵牾如此又公年十九始來京師在貞元二年也至貞元十九年實十八年矣今云來京師於今十五年洪雖以再至言之其實牽合也併誌所疑以俟知者洪譜又云是時有詔以旱飢蠲租之半有司徵愈急公與張署李方叔上疏言關中天下根本民急如是請寬民徭而免田租天子惻然卒為幸臣所讒貶連州陽山令幸臣李實也見進學解及祭張署文舊史云愈嘗上章數千言極論宮市之弊貶陽山令疏今不傳則公之被絀坐論此兩事也方攷云公陽山之貶寄三學士持敘述其詳而行狀但云為幸臣所惡出宰陽山

神道碑亦只云因疏關中旱飢專政者惡之則其非為
論宮市明矣今公集有御史臺論天旱人飢狀與詩正
合況鮑湜皆从公遊者不應公嘗論宮市數千言而狀
及碑誌略不一言及也然行狀且謂為幸臣所惡而公
詩云或自疑上疏上疏豈其由則是又未必皆上疏之
罪也又曰同官盡才俊偏善柳與劉或慮語言泄傳之
落寬雋又岳陽樓詩云前年出官由此禍最無妄姦猜
畏彈射斥逐恣欺誑是蓋為王叔文韋執誼等所排矣
德宗晚年韋王之黨已成是年補闕張正買疏諫它事
得召見與所善者數人皆被譴斥意公之出有類此也
憶昨行云任文未摘崖州職雖得赦宥常愁猜是其為
叔文等所排豈不明甚特無所歸咎駕其罪於上疏耳
洪蕪宮市旱飢兩事言之而又不考韋王始末故為申
及之洪譜又云以公詩攷之蓋以十九年冬末貶官
二十年甲申春始到陽山時有同冠峽貞女峽和張十
一功曹送劉生謝李員外諸詩及別知賦送楊八弟歸

湖南序區冊序答賓存
亮書王弘中燕喜亭記

改江陵法曹參軍

洪譜及歷官
記云廿一年

乙酉正月丙申順宗即位二月甲子大赦八月辛丑改
元永貞遷者皆追回愈為觀察使所抑財徙江陵府法
曹參軍事見八月十五夜贈張功曹詩及張署墓誌河
南同官記洪又云公以今年春遇赦夏秋離陽山竣命
於郴者三月至秋末始受法曹之命見祭李郴州文時
有郴州祁雨及郴州口諸詩自郴至衡有合江亭及謁衡
岳廟詩自衡至潭有陪杜侍御遊湘西寺及湘中諸詩
自此泛洞庭有阻風贈張十一詩至岳州有別竇司直
詩赴江陵有途中寄翰林三學士詩又有送孟瑄序荆
潭唱和序上李吳書鄭夫人殯表及五箴序云余生三
十有八年則其箴蓋是年作所謂幕中之辨
蓋謂在徐州時臺中之評則謂為御史時也
知國子博士分司東都三歲為真

洪譜云永貞二年丙
戌正月丙寅朔改元

元和初權

元和時憲宗即位之踰年也公年三十有九其春夏猶在江陵有李花寒食出游夜歸贈張十一鄭羣贈筆答張徹諸詩六月自江陵召拜國子博士還朝後有豐陵行游青龍寺贈崔立之送文暢諸詩城南諸聯句及祭十二兄岌文并墓誌二年丁亥春公為博士有元和聖德詩并釋言行狀云宰相有愛公文者將以文學職處公有爭先者構公語以飛之公恐及難遂求分司東都而公作周況妻韓氏墓誌乃云從兄俞卒開封尉愈於時為博士乞分教東都生以收其孥於開封界中教畜之飛語即釋言所解之讒而竟不能解致以兄喪為辭而求去耳時宰相鄭絪翰林舍人李吉甫裴均也公以夏末離京赴東都有酬裴十六途中見寄詩是年有張中丞傳後叙答馮宿書盧於陵墓誌三年戊子改真博士見行狀有酬崔十六少府及東都遇春詩與少室李渤書裴復墓誌新史渤傳云洛陽令韓愈遺渤書蓋公時為博士五年方為河南令未嘗為洛陽令也

尋

欽定四庫全書

東坡遺集卷之七

七

改都官員外郎即拜河南令

洪譜云四年己丑公年四十二改都官員外郎守東

都省神道碑云除尚書都官郎中分司判祠部行狀新舊史皆云員外郎送李正字序亦但云都官郎碑文誤也方攷公除都官六月十日也制辭亦作員外郎洪譜又云神道碑云中官號功德使司京城觀寺尚書欽手失職先生按六典盜索之以歸誅其無良時其出入禁譁衆以正浮屠歷官記云公判祠部日與宦者為敵惡言罵解狼籍公牒乃上書留守鄭餘慶乞與諸郎官更判不見允在東都有游嵩洛諸題名送李翱侯參謀和盧汀錢徽與竇韋尋劉尊師諸詩送李正字歸湖南序并詩鄭涵校理序祭薛公達丈并墓誌京兆韋夫人墓誌河南府同官記五年庚寅後河南縣令神道碑云魏鄆幽鎮各為留郎貯潛卒以橐罪士官無敢問者先生將隨其禁以壯朝廷斷民署吏俟令且發留守尹大恐遽相禁有使還為言憲宗悅曰韓愈助我者是後鄆郎

果謀反東都將署留守以應淮蔡人有上留守鄭公啟
時公以論事失鄭公意既令河南軍人有罪公追而救
之留守不悅公以啟辨明且力求去見集中行狀云改
河南令日以職分辨於留守及尹汝軍士莫敢犯禁疑
鄭公卒聽其言改軍人畏服如此也在河南有感春詩
燕河南秀才序送石洪序并詩及月蝕招楊之果河南
令舍池臺諸詩張
圓墓碣盧殷墓誌
遷職方員外郎
尚書職方員外郎是
年春公尚在河南有送窮文辛卯年雪寄盧仝誰氏子
諸詩送溫進序孔母誌至京師有酬盧雲夫望秋作石
鼓歌復離狀盧丞
房武畢垌墓誌
華陰令柳澗有臯前刺史劾奏之未

報而刺史罷澗諷百姓遮索軍頓役直後刺史惡之按
其獄貶澗房州司馬愈過華以為刺史陰相黨上疏治

欽定四庫全書

東雅堂品彙集註
本傳

八

之既御史覆問得澗賊再貶封溪尉愈坐是復為博士

洪譜云七年壬辰二月乙未以職方員外郎復為國子
博士年四十五舊史云愈因使過華上疏理澗公自去
年以來未嘗出使或云即公赴職方時過華觀其事遂
疏于朝爾進學解云三年博士冗不見治舊又作三為
博士按公貞元壬午授四門博士元和丙戌為國子博
士丁亥分教東都今年又自郎中下遷凡四為博士矣
此先言暫為御史繼言三為博士則自丙戌而後三歷
此官也若云三年則自元年夏赴召至四年春尚為博
士首尾已四年矣方攷云丙戌初除丁亥分教自不必
釐而為二具為博士實三遷也當作三為為是今按
上句言暫為御史而此言三年博士正以其居官之久
近為言恐當作年為是然亦未敢必也洪譜又云是
年二月有論錢重物輕狀新志云自建中定兩稅而物
輕錢重民以為患於是詔百官議革其弊方攷以為此

議在穆宗即位之初通鑑附之長慶元年秋為得其實
今年初無此議也惟會要載元和六年二月制謂建中
後貨輕物重許諸道所納見錢五分量徵二分餘三分
燕納實估匹段或當時有此議然亦非七年也況公六
年二月尚在東都洪誤矣洪譜又云是年有石鼎聯
句贈劉師服詩祭石洪文李素石洪墓誌路應神道碑
既才高數黜官又下遷乃作進學解以自諭執政覽之

奇其才改比部郎中史館修撰

洪譜云此除在八年癸巳三月乙亥舊史云執

政覽其文而憐之以其有史才故除是官時宰相武元
衡李吉甫李絳也是年有答劉秀才論史書及烏氏田

氏廟碑鄭詹神道碑李虛
中董溪息國夫人墓誌

轉考功知制誥

洪譜云九年甲午十月甲

子為考功郎中依前史館修撰十二月戊午以考功知
制誥是年有元微之書田弘正書送張道士序劉昌裔

神道碑王適孟郊扶風郡夫人墓誌十年乙未公知制誥有和庫部盧曹長元日朝迴及寒食直歸遇雨二詩與李絳書進順宗實錄狀舊史云愈撰實錄繁簡不當叙事拙於取舍按退之作史詳略各有意削去常事著其繁於政者其裒善貶惡之旨明甚當時議者非之卒竄走無全篇良可惜也史又云愈說禁中事頗切直內官惡之往往於上前言其不實此言是也是年有與柳公綽二書論淮西事宜狀說見明年又有捕賊行賞表藍田縣丞廳記獨孤郁衛之立墓誌徐偃王廟碑

進中書舍人初憲宗將平蔡

命御史中丞裴度使諸軍按視及還具言賊可滅與宰相議不合愈亦奏言淮西連年侵掠得不償費其敗可立而待然未可知者在陛下斷與不斷耳執政不喜會

有人詆愈在江陵時為裴均所厚均子鐸素無狀愈為

文章字命鐸謗語囂暴由是改太子右庶子

洪譜云十一年丙申

正月丙戌以考功郎中知制誥遷中書舍人丙申賜緋魚五月癸未降為太子右庶子行狀云盜殺武元衡公以為盜殺宰相而遽息兵其為懦甚大兵不可以息以天下力取三州尚何不可與裴丞相識合故兵遂用而宰相有不便之者月滿遷中書舍人後竟以它事改右庶子時宰相李逢吉韋貫之也其云月滿遷中書舍人者蓋唐制臺郎滿歲則遷公以去年冬知制誥至今春充一歲矣李漢云收拾遺文無所失墜公掌綸誥一年無一篇見收者失墜多矣唯後集有崔羣戶部侍郎制一首爾今按行狀通鑑洪譜論淮西事宜狀在去年知制誥時而神道碑新史則在遷中書舍人之後但行狀言公所論有殺宰相事乃在去年六月而狀中實無

此語若狀果在六月之後則不應全不言及則是此狀不惟不在十一年正月之後亦不在十年六月之後也故通鑑直以繫於五月之下行狀敘事雖實而記言則誤碑文新史固為失之今當以通鑑為正洪禧又云是年有酬盧雲夫曲江荷花行周況及度以宰相節度妻韓氏墓誌王用碑科斗書後記

彰義軍宣慰淮西奏愈行軍司馬愈請乘遽先入汴說

韓弘使協力元濟平遷刑部侍郎

行狀神道碑及舊史云十二年丁酉秋以

兵老久屯賊未滅上命裴丞相為淮西節度使以招討之丞相請公以行賜三品衣魚為行軍司馬從丞相居於郾城軍出潼關公請先乘遽至汴感說都統弘弘說用命師乘遽和公知蔡州精卒悉聚界上以拒官軍守城者率老弱且不過千人亟白丞相請以兵三千人間道以入必擒吳元濟丞相未及行而李愬自唐州大城

墨提其卒以夜入蔡州果得元濟三軍之士為公恨蔡
州既平布衣柘耜以計謁公公與語奇之遂白丞相曰
淮西滅王承宗膽破可不勞用眾宜使辯士奉相公書
明禍福以招之彼必服丞相然之公口占為書使柘耜
袖之以至鎮州承宗果大恐上表請割德棣二州以獻
遣子入侍丞相歸京師以功遷刑部侍郎詔公撰平淮
西碑其辭多叙裴度事時先入蔡州擒元濟李愬功第
一愬不平之愬妻出入禁中因訴碑辭不實詔令磨公
文命翰林學士段文昌重撰文勒石是年有送殷侗序
祭張署文并墓誌及東征往還酬唱諸詩晚秋鄆城夜
會聯句為刑部時有舉錢徽自代狀十三年戊戌四月
鄭餘慶為詳定禮樂使奏韓愈李程為副是年有李惟
簡墓誌權
憲宗遣使者往鳳翔迎佛骨入禁中三日乃

德興碑

送佛祠王公士庶奔走膜嘔至為佛法灼體膚委珍貝

騰沓係路愈聞惡之乃上表極諫帝大怒持示宰相將抵以死裴度崔羣曰愈言訐悟罪之誠宜然非內懷至忠安能及此願少寬假以來諫爭帝曰愈言我奉佛太過猶可容至謂東漢奉佛以後天子咸天促言何乖刺耶愈人臣狂妄敢爾固不可赦於是中外駭懼雖戚里諸貴亦為愈言乃貶潮州刺史既至潮以表哀謝帝頗感悔欲復用之持示宰相曰愈前所論是大愛朕然不當言天子事佛乃年促耳皇甫鏞素忌愈直即奏言愈

終狂䟽可且內移乃改袁州刺史初愈至潮問民疾苦
皆曰惡溪有鱷魚食民畜產且盡民以是窮數日愈自
往視令其屬秦濟以一羊一豕投谿水而祝之是夕暴
風震電起谿中數日盡涸西徙六十里自是潮無鱷魚
患袁人以男女為隸過期不贖則沒入之愈至悉計庸

得贖所沒歸之父母七百餘人因與約禁其為隸

洪諧云公

以十四年己亥正月癸巳貶潮州刺史宰相疑馮宿草
䟽出宿為欽州刺史時宰相皇甫鏗程异也公之被謫
即日上道便道取疾以至海上據宜城驛記則以三月
二日過宜城據瀧吏詩則以三月幾望至曲江據謝表

欽定四庫全書

本傳

則以三月二十五日至潮州據祭文則以四月二十四日逐鯪魚其自曲江至潮以十許日行三千里蓋龍水湍急故也方攷乃云謝表及祭神文皆止云今月而逐鯪魚文正本皆但云年月日則公之到郡實不知何月日也況自韶至廣雖為順流而自廣之惠自惠之潮水陸相半要非旬日可到故公表亦云自潮至廣來往動皆經月則公到郡決非三月而逐鯪魚亦未必在四月二十四日也今按道里行程則方說為是但與大顛第一書石本乃云四月七日則又似實以三月二十五日到郡也未詳其說闕之可也洪譜又云公自京師至潮有路旁猴至藍闌示姪孫湘武關西逢配流吐蕃食曲江驛次鄧州界過南陽龍吏題臨龍寺至韶州寄張使君酬張使君惠書過始興江口感懷贈元十八協律初南食貽元十八答柳柳州食蝦蟇別趙子諸詩及宜城驛記潮州謝表祭鯪魚文請置鄉校牒賀冊尊號表是年七月己丑羣臣上尊號大赦十月己巳準例量

移改授袁
州刺史

召拜國子祭酒

洪譜云十五年庚子閏正月
穆宗即位公以今年春到袁

途中有酬張韶州端公及韶州留別張使君二詩至袁
有袁州謝上賀穆宗即位賀赦賀冊皇太后賀慶雲五
表舉韓泰自代狀滕王閣記九月召拜國子祭酒而閣
記乃云十月袁州刺史者蓋命下在九月受命在十月
也有祭湘君夫人文祭文所謂復其章綬者公為行軍
司馬時賜金紫今為祭酒始復其舊也自袁趨京師有
次石頭驛寄江西王中丞閣老仲舒詩至江州有寄鄂
岳李大夫程及題西林寺故蕭二郎中舊堂詩因話錄
云蕭穎士子存字伯誠為金部員外郎惡裴延齡之為
人弃官歸廬山公少時嘗受金部賞知及經江州遊廬
山訪金部故居因賦此詩留百鍊以極之行次安陸有
寄隨州周員外君巢二詩至棗陽縣有題廣昌館詩至
襄州有醉中留別李相公詩以冬暮至京師是年有南
海廟碑與孟簡書論黃家賊事宜及與貼良人男女狀

欽定四庫全書

本傳

又論夷獠請因改元大慶遣使宣諭仍擇經略使撫之
又有柳子厚从姪孫滂祭大墓誌洪譜又云行狀云
公入還祭酒有直講能說禮而陋容學官多豪族子攢
之不得共食公命吏曰召直講來與祭酒共食學官由
此不敢賤直講奏儒生為學官日使會講生徒奔走聽
聞皆相喜曰韓公來為祭酒國子監不寂寞矣公在國
子有雨中寄張籍詩舉張惟素自代反請復國子監
生生徒狀論新注學官牒薦張籍狀請上尊號表
轉兵部侍郎洪譜云此除在長慶元年辛丑七月時有
舉韋顓自代狀李邦張徹祭文李邦鄭羣

薛戎墓誌

今按方氏增攷
論錢重物輕狀當在此年秋

鎮州亂殺田弘正而立王

廷湊詔愈宣撫既行衆皆危之元稹言韓愈可惜穆宗

亦悔詔愈度事從宜無必入愈曰安有受君命而滯留

自顧遂疾驅入廷湊嚴兵迓之甲士陳庭既坐廷湊曰
所以紛紛者乃此士卒也愈大聲曰天子以公為有將
帥材故賜以節豈意同賊反邪語未終士前奮曰先太
師為國擊朱滔血衣猶在此軍何負朝廷乃以為賊乎
愈曰以為爾不記先太師也若猶記之固善且為逆與
順利害不能遠引古事但以天寶來禍福為爾等明之
安祿山史思明李希烈梁崇義朱滔朱泚吳元濟李師
道有若子若孫在乎亦有居官者乎衆曰無愈曰田公

以魏博六州歸朝廷官中書令父子受旗節劉悟李祐皆大鎮此爾軍所共聞也衆曰弘正刻故此軍不安愈曰然爾曹害田公又殘其家矣復何道衆乃謹曰侍郎語是廷湊恐衆心動遽麾使去因泣謂愈曰今欲廷湊何所為愈曰神策六軍之將如牛元翼比者不少但朝廷顧大體不可棄之公久圍之何也廷湊曰即出之愈曰若爾則無事矣會元翼亦潰圍出廷湊不追愈歸奏其語帝大悅轉吏部侍郎

洪譜云長慶元年七月鎮州亂殺田弘正立王廷湊命深

州刺史牛元翼節度深冀以討之十月命裴度為鎮州
四面行營都招討使元翼為延奏所圍二年壬寅二月
敕廷湊詣愈宣撫歸而牛元翼果出行狀云公還於上
前奏與廷湊及三軍語上大悅曰卿直向伊如此道由
是有意大用授吏部侍郎今按先太師謂故鎮帥王
武俊也神道碑云方鎮反太原兵以輕利誘迴乾召
先生禍福譬引虎鬻膽血直今所患非兵不足遽疎陳
得失今按此數語不可晚它書亦皆無之未詳何謂
恐有誤也洪譜又云是年有次壽陽驛次太原呈副
使吳郎中次承天營奉酬裴司空鎮州路上酬裴司空
重見寄鎮州初歸諸詩及韋侍講盛山詩序論變鹽法
事宜狀二年壬寅九月轉吏部侍郎行狀云凡令吏皆
不鎖聽出入或問公公曰人所以畏鬼者以其不能見
也鬼如可見則人不畏矣選人不得見令史故令史勢
重聽其出入故勢輕是年有鄂州谿堂詩實
司業祭文墓誌楚國夫人墓誌黃陵廟碑

時宰相李

逢吉惡李紳欲逐之遂以愈為京兆尹兼御史大夫特詔不臺參而除紳中丞紳果劾奏愈愈以詔自解其後大刺紛然宰相以臺府不協遂罷愈為兵部侍郎而出

紳江西觀察使紳見帝得留愈亦復為吏部侍郎

洪三

年癸卯六月以吏部侍郎為京兆尹兼御史大夫勅臺參後不得為例十月癸巳為兵部侍郎庚子為吏部侍郎行狀云改京兆尹六軍將士皆不敢犯私相告曰是尚欲燒佛骨者安可忤故盜賊止遇旱米價不敢上李紳為御史中丞械囚送府使以尹杖杖之公曰安有此使歸其囚是時紳方幸旦夕且相宰相欲去之故以臺與府不協為請兩改其官紳既復留公入謝上曰卿與紳爭何事公因自辨數日復為吏部侍郎紳道碑

云復為兵部侍郎銓不鎖入更選父七十母六十身七十
十患與三利取才財勢路絕今按碑失兵部一節此
兵字當作吏字不鎖入吏即謂前縱吏出入事三利取
才未詳其義疑銓法有此語或是有脫誤也洪譜云
公為京兆有舉馬總自代狀賀雨及賀太陽不虧東祭
竹林神曲江祭龍文再為兵部有舉張正甫自代狀是
年有羅池廟碑送鄭權序并詩祭馬總女孥長慶四年
文并孥干女孥墓誌韓弘碑論孔戣致仕狀

卒年五十七贈禮部尚書諡曰文

洪譜云四年甲辰正月收宗即位二月有

王仲舒碑四月有張徹墓誌八月有孔戣墓誌是年公
沒年五十七行狀云得病滿百日假既罷以十二月二
日卒於靖安里第公屬續語曰某伯兄德行高曉方藥
食必視本草年止於四十二某疎愚食不擇禁忌位為
侍郎年出伯凡十五歲矣如又不足於何而足且獲終
於牖下幸不至失大節以下見先人可謂榮矣明年張

籍祭公詩有云去夏公請告養疾城南莊籍時官休罷
兩月同遊翔又曰共愛池上佳聯句舒遐情又曰公為
海溪詩唱詠多慨懷城南莊在長安城南公之別墅也
池上聯句集中無之游溪詩即南溪始泛三首是也又
曰公有曠達識生死為一網及當臨終晨意色亦不荒
贈我珍重言傲然委衾囊其於死生之際如此神道
碑云遺命喪葬無不如禮俗習佛法蓋寫浮圖日以七
數之及拘陰陽所謂吉凶一無污我今按此事可見
公之平生謹守禮法排斥異教自信之篤至死
不變可以為後世法而譜不載蓋不以為然也

愈性明

銳不詭隨與人交終始不少變成就後進士往往知名
經愈指授皆稱韓門弟子愈官顯稍謝遣凡內外親若
交友無後者為嫁遣孤女而卹其家嫂鄭喪為服暮以

報

行狀云公氣厚性通論議多大體神道碑云朝有大

獄大疑文武會同莫先發言先生授經引決考合傳
記侃侃正色伏其所詞墓誌云公洞朗軒闕不施戰
平居雖寢食未嘗去書怠以為枕餐以飴口講評孜孜
以磨諸生恐不完美游以談笑嘯歌使皆醉義忘歸嗚
呼可謂樂易君子鉅人者矣碑又云內外惇弱悉撫之
一親以仁使男有官女有從不啻於已生交於人已而
我負終不計死則死其家均食剖資雖微弱待之如賢
戚人詬笑之愈篤未嘗一食不對客閨人或盡見其面
退相指語以為異事未嘗宿貨餘財每曰吾前日解衣
質食今存
有已多矣
每言文章自漢司馬相如太史公劉向揚雄

後作者不世出故愈深探本元卓然樹立成一家言其原
道原性師說等數十篇皆奧衍闡深與孟軻揚雄相表

裏而佐佑六經云至它文造端置辭要為不襲蹈前人者然惟愈為之沛然若有餘至其徒李翱李漢皇甫湜從而效之遽不及遠甚從愈游者若孟郊張籍亦皆自

名於時

墓誌云先生之作無圓無方至是歸工扶經之心執聖之權尚友作者跋邪舐異以扶孔氏存

皇之極知人罪非我計姑古涵今無有端涯渾渾灝灝不可窺校及其酣放豪曲快字凌紙怪發鯨鯨春麗驚擢天下然而乘密竊妙章妥句適精能之至入神出天嗚呼極矣後人無以加之矣姬氏已來一人而止矣

按知人罪非我計此句中必有脫誤疑當云人知人罪非我所計方氏附錄程子曰韓愈亦近世豪傑之士如原道之言雖不能無病然自孟子以來能知此者獨愈而已其曰孟氏醇乎醇又曰荀與揚也擇焉而不精

語焉而不詳若無所見安能由千載之後判其得失若是之明也又曰退之晚年之文所見甚高不可易而讀也古之學者修德而已有德則言可不學而能此必然之理也退之乃以學文之故日求其所未至故其所見反此其於為學之序雖若有所度者然其言曰軻之死不得其傳此非有所襲於前人之語又非鑿空信口率然而言之是必有所見矣若無所見則其所謂以是而傳者果何事邪今按諸賢之論唯此二條為能極其深處然復考諸臨川王氏之書則其詩有曰紛紛易盡百年身舉世何人識道真力去陳言誇末俗可憐無補費精神其為予奪乃有大不同者故嘗折其衷而論之竊謂程子之意固為得其大端而王氏之言亦自不為無理蓋韓公於道知其用之周於萬事而未知其體之具於吾之一心知其可行於天下而未知其本之當先於吾之一身也是以其言常詳於外而略於內其志常極於遠大而其行未必能謹於細微雖知文與道有內

外淺深之殊而終未能審其緩急重輕之序以決取舍雖知汲汲以行道濟時抑邪與正為事而或未免雜乎貪位慕祿之私此其見於文字之中信有如王氏所譏者矣但王氏雖能言此而其所謂道真者實乃老佛之餘波正韓公所深詆則是楚雖失而齊亦未為得耳故今無存其說而因附以狂妄管窺之一二私竊以為若以是而論之則於韓公之學所以為得失者庶幾其有分乎

贊曰唐興承五代剖分王政不綱文弊質窮蠹俚混并天下已定治荒剔蠹討究儒術以興典憲薰醲涵浸殆百餘年其後文章稍稍可述至貞元元和間愈遂以六經之文為諸儒倡障隄末流反剋以樸剗偽以真然愈

之才自視司馬遷揚雄至班固以下不論也當其所得粹然一出於正刊落陳言橫鶩別驅汪洋大肆要之無牴牾聖人者其道蓋自比孟軻以荀況揚雄為未淳寧不信然至進諫陳謀排難卹孤矯拂媮末皇皇於仁義可謂篤道君子矣自晉訖隋老佛顯行聖道不斷如帶諸儒倚天下正議助為怪神愈獨喟然引聖爭四海之感雖蒙訕咲踰而復奮始若未之信卒大顯於時昔孟軻拒揚墨去孔子才二百年愈排二家乃去千餘歲撥

衰反正功與齊而力倍之所以過況雄為不少矣自愈
沒其言大行學者仰之如泰山北斗云

文錄序

趙德

昌黎公聖人之徒歟其文高出與古之遺文不相上下
所履之道則堯舜禹湯文武周孔孟軻揚雄所授受服
行之實也固已不雜其傳由佛及聃莊揚之言不得干
其思入其文也以是光於今大於後金石燹鏤斯文燦
然德行道學文庶幾乎古蓬茨中手持目覽飢食渴飲

沛然滿飽顧非適諸聖賢之域而謬志於斯將所以盜其影響僻處無備得以所遇次之為卷私曰文錄實以師氏為請益依歸之所云

實或作寶

記舊本韓文後

歐陽文忠公

予少家漢東漢東僻陋無學者吾家又貧無藏書州南有大姓李氏者其子彥輔頗好學予為兒童時多游其家見其弊筐貯故書在壁間發而視之得唐昌黎先生文集六卷脫略顛倒無次第因乞李氏以歸讀之見其

言深厚而雄博然予猶少未能究其義徒見其浩然無涯若可愛是時天下學者楊劉之作號為時文能者取科第擅名聲以誇榮當世未嘗有道韓文者予亦方舉進士以禮部詩賦為事年十有七試于州為有司所黜因取所藏韓氏之文復閱之則喟然嘆曰學者當至於是而止爾因怪時人之不道而顧已亦未暇學徒時時獨念于予心以謂方從進士干祿以養親苟得祿矣當盡力于斯文以償其素志後七年舉進士及第官于洛

陽而尹師魯之徒皆在遂相與作為古文因出所藏昌黎集而補綴之求人家所有舊本而校定之其後天下學者亦漸趨於古而韓文遂行于世至于今蓋三十餘年矣學者非韓不學也可謂盛矣嗚呼道固有行於遠而止於近有忽于往而貴于今者非惟世俗好惡之使然亦其理有當然者故孔孟惶惶於一時而師法於千萬世韓氏之文沒而不見者二百年而後大施於今此又非特好惡之所上下蓋其久而愈明不可磨滅雖蔽

予暫而終耀于無窮者其道當然也予之始得於韓也當其沈沒弃廢之時予固知其不足以追時好而取勢利於是就而學之則予之所為者豈所以急名譽而干勢利之用哉亦志乎久而已矣故予之仕於進不為喜退不為懼者蓋其志先定而所學者宜然也集本出於蜀文字刻畫頗精於今世俗本而脫繆尤多凡三十年間聞人有善本者必求而改正之其最後卷秩不足今不復補者重增其故也予家藏書萬卷獨昌黎先生為

舊物也嗚呼韓氏之文之道萬世所共尊天下所共傳

而有也予於此本特以其舊物而尤惜之

泉本云吾少居漢東年十

五六時於里人李堯輔家見一弊篋弃在壁角中有故書數十冊因得韓文於其間皆脫落無次序吾略讀之愛其文辨而意深當是時學者方作時文天下之人無道韓文者予亦將舉進士以歛祿利未暇學也遂求於李氏而得之以歸補次成秩而藏之數年始及第遂官于洛而得師魯與之遊因出韓文而學之自後天下學者亦稍稍近古吾家所藏書萬卷然獨韓文最為舊物君為吾愛惜之可也今按泉州本乃汪彥章所刻此序獨與諸本不同不知何據其所謂君者又不知為何人也今并存之以俟知者

潮州韓文公廟碑

蘇文忠公

匹夫而為百世師一言而為天下法是皆有以參天地之化關盛衰之運其生也有自來其逝也有所為矣故申呂自嶽降而傳說為列星古今所傳不可誣也孟子曰吾善養浩然之氣是氣也寓於尋常之中而塞乎天地之間卒然遇之則王公失其貴晉楚失其富良平失其智賁育失其勇儀秦失其辯是孰使之然哉其必有不依形而立不恃力而行不待生而存不隨死而亡者矣故在天為星辰在地為河嶽幽則為鬼神而明則復


為人此理之常無足怪者自東漢以來道喪文弊異端
並起歷唐貞觀開元之盛輔以房杜姚宋而不能救獨
韓文公起布衣談笑而麾之天下靡然從公復歸于正
蓋三百年於此矣文起八代之衰而道濟天下之溺忠
犯人主之怒而勇奪三軍之帥此豈非參天地關盛衰
浩然而獨存者乎蓋嘗論天人之辨以謂人無所不至
惟天不容偽智可以欺王公不可以欺豚魚力可以得
天下不可以得匹夫匹婦之心故公之精誠能開衡山

之雲而不能回憲宗之惑能訓鱷魚之暴而不能弭皇
甫鏹李逢吉之謗能信於南海之民廟食百世而不能
使其身一日安於朝廷之上蓋其所能者天也其所不
能者人也始潮人未知學公命進士趙德為之師自是
潮之士皆篤於文行延及齊民至于今號稱易治信乎
孔子之言君子學道則愛人而小人學道則易使也潮
人之事公也飲食必祭水旱疾疫凡有求必禱焉而廟
在刺史公堂之後民以出入為艱前守欲請諸朝作新

廟不果元祐五年朝散郎王君滌來守是邦凡所以養
士治民者一以公為師民既悅服則出令曰願新公廟
者聽民謹趨之卜地於州城南七里期年而廟成或曰
公去國萬里而謫于潮不能一歲而歸沒而有知其不
眷戀于潮也審矣軾曰不然公之神在天下者如水之
在地中無所往而不在也而潮人獨信之深思之至煮
蒿悽愴若或見之譬如鑿井得泉而曰水專在是豈理也
哉元豐七年詔封公昌黎伯故榜曰昌黎伯韓文公之

廟潮人請書其事于石因為作詩以遺之使歌以祀公
其詞曰公昔騎龍白雲鄉手抉雲漢分天章天孫為織
雲錦裳飄然乘風來帝旁下與濁世掃秕糠西游咸池
略扶桑草木衣被昭回光追逐李杜參翱翔汗流籍湜
走且僵滅沒倒景不可望作書詆佛譏君王要觀南海
窺衡湘歷舜九疑弔英皇祝融先驅海若藏約束蛟鱷
如驅羊鈞天無人帝悲傷謳吟下招遣巫陽攝牲雞卜
羞我觴於粲荔丹與蕉黃公不少留我涕滂翩然被髮

下大荒



朱子校昌黎集傳

欽定四庫全書

集部

東雅堂昌黎集註卷一

詳校官通政使_臣夢吉

檢討_臣何思鈞覆勘

總校官檢討_臣何思鈞

校對官編修_臣勵守謙

謄錄監生_臣劉贊化

欽定四庫全書

集部二

東雅堂昌黎集註卷一

別集類一 唐

賦

宋昌公云馮章靖親校舊本每卷首具列卷中篇目馮志以朱墨減殺之惟存其都凡集外別

有目錄一卷今按李漢所作序云總七百首并目錄合四十一卷則正與馮合

感二鳥賦

并序 公貞元十一年正月至三月以前進士三上宰相書不報時宰相

趙憬賈耽盧邁宜其不過也五月東歸遇所獻二鳥感而作公之賦見於集者四大抵多

有取於離騷之意此篇蘇子美亦謂其悲激頓挫有騷人之思疑其年壯氣銳欲發其藻

章以耀于世蘇語雖少貶然進學解所云不虛矣

貞元十一年

一或作五以諸譜考之作一為是

五月戊辰愈東歸癸酉

自潼關

潼關在華陰

出息於河之陰時始去京師有不遇時

之歎見行有籠白鳥白鸛鵒而西者

舊史德宗貞元十一年河陽獻白鳥

號於道曰某土之守某官

一作某土之守臣某用禮記全句

守音狩

使使

者進於天子

使使下去音

東西行者皆避路

西下閭杭本無行字攷之禮記

及公送溫造序當有

莫敢正目焉因竊自悲幸生天下無事時承

先人之遺業不識干戈耒耜攻守耕獲之勤讀書著文

自七歲至今凡二十二年其行已不敢有愧於道

於杭作之

是非其閒居思念前古當今之故亦僅志其一二大者焉

選舉於有司與百十人偕進退

十或作千此專為選舉而言也貞元九年應宏

詞者僅三十二人作十為是退上或再有偕字

曾不得名薦書

方从閣本名上有列字名下有

於字

今按嘉祐抗本與謝本並無此二字語簡而意已足方本非是

齒下士于朝以仰

望天子之光明今是鳥也惟以羽毛之異

以下或有其字非有

道德智謀承顧問贊教化者乃反得蒙採擢薦進光耀

如此

此下諸本有可以人而不如鳥乎一句今從閣本文粹刪去

故為賦以自悼且

明夫遭時者雖小善必達不遭時者累善無所容焉其

辭曰

吾何歸乎

此句或在苟有食其從之下

吾將既行而後思誠不足以

自存苟有食其從之

苟或作最非是

出國門而東驚

音務馳也

觸白

日之隆景時返顧以流涕念西路之羌永

路一作洛羌或作差今

按作差固謬然羌乃發語之詞施之句內似亦未安以上文返顧流涕之語推之則西路乃長安之路而此字當為浸漸愈益之意不知

的是何字又恐或是適字

過潼關而坐息窺黃流之奔

猛

黃流或作流黃感二鳥之無知方蒙恩而入幸惟進退之殊

異增余懷之耿耿彼中心之何嘉

或作其嘉或作憲非是

徒外飾

馬是逞

馬或作而

余生命之湮阨曾二鳥之不如汨東西與

南北

楚辭汨余若將不及說文水流也

汨音聿

恒十年而不居

恒或作汨或作以

恒居鄧切與亘竟之亘同班固敘傳恒以年歲選詩徙倚恒漏窮

敘

辱飽食其有數

其一

況策名於薦書

策方從閣杭作榮云公上宰相書非苟沒於利榮於名也與此義通

今按唐

人策字俗體從竹從宋亦有只從艸者與榮字絕相近故閣本作榮蓋傳寫之誤耳方引榮於名亦與此語意

不相似於或作與亦未是

時所好之為賢

好去聲

庸有謂余之非愚昔

殷之高宗得良弼於宵寐

或云昔上當有在字或是念字由上句末有愚字相似而

也孰左右者為之先信天同而神比

先下或有容字信或作容皆非是漢

鄭食其傳沛公吾所願從遊莫為我先韓語祖此

及時運之未來或兩求而莫

致雖家到而戶說

或作曉

祇以招尤而速累蓋上天之生

余亦有期於下地盡求配於古人獨怡悵於無位惟得

之而不能

惟方作雖惟字正是韓轉處作雖即無力矣能或作孤亦非是

乃鬼神之所

戲幸年歲之未暮庶無羨於斯類

今按上文之意若曰天之生我必有所用

何不力慕古人如傳說之徒而獨怡悵於無位耶惟或者苟得其位而不能追配古人但如二鳥之空破榮寵

乃是鬼神之所戲耳故幸年歲之未晚而庶幾無慕于斯類也斯類蓋并指二鳥與彼得之而不能者而言也

歐陽文忠讀李習之幽懷賦以謂朝一時有道而能文者莫如韓愈愈嘗有賦矣不過羨二鳥之光榮歎一

飽之無時爾是心使光榮而飽則不復云矣若翺獨不
然其賦曰衆囂囂而雜處兮咸嘆老而嗟卑視余心之
不然兮慮行道之猶非怪神堯以一旅取天下而後世
子孫不能以天下取河北以為憂嗚呼使當時君子皆
易其歎老嗟卑之心為翺所憂之心唐之天下豈有亂
與亡哉歐陽子之論善矣雖然公不云乎文章之作常
發於羈旅草野至王公貴人氣得志滿非性能而好之
則不暇以為感二鳥賦蓋所謂發於羈旅草野者使其
光榮而飽憂天下之心孰謂公一日忘耶

復志賦

并序

猶未得仕東歸十二年擢進士第十一年

又辭以疾此賦句法步驟離騷往往相似晁無咎嘗取此賦於變騷中

愈既從隴西公平汴州

隴西公董晉也按晉行狀貞元十一年七月拜檢校尚書左僕

射汴州刺史晉受命遂行公及劉宗經韋弘景實從之
辟公為汴州觀察推官其曰明年七月則十三年作也

其明年七月有負薪之疾

負薪賤者之稱禮記問庶人

能負薪也又君使士射不能則辭以疾曰某有負薪之
憂鄭氏註憂亦作疾公羊注云大夫病曰犬馬士病

曰負薪公病作此賦故云退休于居作復志賦其辭曰

居悵悵之無解兮

悵音邑憂也選云良
增悵悵解或作辭

獨長思而永歎

音灘騷云心鬱鬱之憂
思兮獨永歎乎增傷

豈朝食之不飽兮寧冬裘之不

完昔余之既有知兮誠坎軻而艱難

坎軻不平易貌選
坎軻多辛苦軻

音可坎或作賦當歲行之未復兮從伯氏以南遷

歲行十二年
而一復大厯

十二年公從兄會南遷韶州時年十歲故云歲凌大江

之驚波兮過洞庭之漫漫按唐地理志洞庭在岳州巴陵縣郭璞注山海經云洞庭

地穴湖水廣闊五百餘里日月若出沒於其中也漫漫大水貌選歸海流漫漫漫謨官切至曲江

而乃息兮唐地理志韶州治曲江縣逾南紀之連山唐一行以天下

兩戒分南北紀韶在南紀之外馬詩云滔滔江漢南國之紀南紀字杜詩多用如南紀風濤壯南紀阻歸楫相

國生南紀之類嗟日月其幾何兮攜孤嫠而北旋謂孤兒嫠

傳云昔子穀其夫已為嫠婦謂會卒於韶州公從嫂歸葬河陽攜戶圭切嫠音塵旋以宣切還也孤嫠一作

嫠值中原之有事兮將就食於江之南方從問本無將

或又無之字今詳文勢皆非是建中二年成德魏博

山南平盧節度相繼稱亂三年王武俊李希烈反四年

淫原姚令言犯京師德宗幸奉天朱泚犯奉天興元

年李懷光反如梁州貞元元年公以中原多故避地江

左始專專於講習兮非古訓為無所用其心方從閭本

作馬非是窺前靈之逸迹兮靈一作修超孤舉而幽尋既識路又

疾驅兮孰知余力之不任音考古人之所佩兮閱時俗

之所服騷云審吾法夫前修兮非世俗之所服服亦佩

古人遠矣惟已可庶幾忽忘身之不肖兮之或作而又

古人也閣抗作闕非是

是謂青紫其可拾夏侯勝謂諸生曰經術苟明取青紫

如俯拾地芥耳梁劉孝標解命論曰

視韓彭之豹變謂鷙猛致人爵見張桓之朱紱謂明經拾青紫豈知有力者運之而趨乎公此語事本夏侯勝

傳而意取劉孝標論

自知者為明今

老子知人者自知者明

故吾之所以為

惑

吾下或有志字非是

擇吉日余西征今亦既造夫京師

京師在西故云

西征公貞元二年自宣城至京師既或作其

君之門不可還而入今

還或徑遂

從試於有司惟名利之都府兮羌衆人之所馳

羌起羊切一或

作差非所或作四騷云羌衆人之所仇

競乘時而附勢

兮紛變化其難推

附勢或作射利或只附字作射字班彪曰乘時射利商人之功此借用其

語以譏世也

全純愚以靖處今將與彼而異宜欲奔走以及

事兮顧初心而自非朝騁駕乎書林兮夕翺翔乎藝苑

揚雄長楊賦云并包書林劇秦美新云發秘府覽書林
遙集乎文雅之圃翺翔乎禮樂之場班固賓戲云真婆

娒乎藝術之場休息乎篇籍之面騁或諒却步以圖前

今却去約切退也家語儒行篇是猶却步而欲求及前
人不可得也前漢劉向傳猶卻行而求及前人也

不浸近而愈遠哀白日之不與吾謀兮至今十年其猶

初豈不登名於一科兮貞元八年公登第曾不補其遺餘進既

不獲其志願兮退將遁而窮居騷云進不入以離尤
兮退將復修吾初服排

國門而東出兮貞元十一年公東歸慨余行之舒舒慨或作嗟時憑高

以迴顧兮涕泣下之交如

之或作而易大
有卦厥孚交如

戾洛師而悵

望兮

戾即計切詩云我客
戾止洛師洛陽也

聊浮游以躊躇

莊子聖人躊
躇以興事注

從容也

騷云聊浮游以
躊躇音躊躇音除

假大龜以視兆兮

大或作火求幽貞

之所廬

幽貞隱者易幽人貞吉廬寄也曹植節遊賦曰
非吾人之所廬顏延年拜陵廟詩幼壯困孤介

未暮謝

甘潛伏以老死兮不顯著其名譽

音歟非夫子之

洵美兮吾何為乎後之都

夫子謂董晉也後之都汴州
也公貞元二年丙寅始自江

南入京師十一年乙亥春三上宰相書不過夏東歸秋
至洛陽十三年丙子秋從董晉入汴州晉辟署試校書

郎為汴宋濂潁泗州觀察推官凡十
餘年矣故上云至今十年其猶初
小人之懷惠兮猶

欽定四庫全書

李雅堂先生集註

七

知獻其至愚固余異於牛馬兮寧止乎飲水而求芻伏

門下而默默兮

下而或作下之

竟歲年以康娛

竟或作卒

時乘閒以

獲進兮

閒何艱切閒暇也又居寬切空隙也楚辭九章篇願乘閒而自察

顏垂歡而愉

愉

而或作之

仰盛德以安窮兮又何忠之能輸昔余之約吾

心兮誰無施而有獲

方從閭本誰作惟下又有德字云李本謂陳無已去德字今本復說

惟為誰其誤甚矣

今按此句本用楚詞孰無施而有獲之語詞意既有自來又與上下文勢

報孰不殖而有獲之語詞意既有自來又與上下文勢

相應故嘉祐杭本與諸本多如此乃是韓公本文相傳已久非陳以意定也閭本之謬如此而方信之反以善

本為誤今不得不辨也又嘉祐杭本世多有之而其疾

不同處方皆不錄豈其偶未見耶抑忽之而不觀也

貪佞之誇濁兮

說文誇濁水不流孟子數

曰吾其既勞

而後食

方無既

是懲此志之不修兮愛此言之不可忘

修

作循云唐人書脩近循楚詞亦有誤者

今按唐人書

字之誤方說是也然此乃脩誤作循非循誤作脩也脩

猶脩好脩怨之脩蓋情怊悵以自失兮心無歸之茫茫

因舊增新之意耳
之或
作而苟不內得其如斯兮孰與不食而高翔抱關之阨

陋兮有肆志之揚揚

諸本多作陽陽後漢孔嵩傳云晨

揚揚公當是用此語詩君子陽陽則

伊尹之樂於畎畝

今焉富貴之能當恐誓言之不固兮斯自訟以成章

斯

作聊訟
或作誦

往者不可復兮冀來今之可望

音忘

閔已賦

公嘗佐董晉于汴未幾晉薨復佐戎徐州徐帥張建封也建封又薨公罷去來

居于洛時貞元十六年也晁無咎嘗取此篇于續楚詞而系之曰愈才高黜官頗自傷

其不遇
故云

余悲不及古之人兮伊時勢而則然

而或作兮

獨閔閔其曷

已兮

閔閔或作閔閔皆復添或云咸通

按洪慶善云歐宋皆無兮字後本復志賦與此賦皆無兮字未

是知孰

憑文章以自宣昔顏氏之庶幾兮在隱約而平寬

楚辭居處愁以隱約兮注謂隱身守約也選魏文帝典論云文王幽而演易不以隱約而不務固哲人

之細事兮夫子乃嗟歎其賢惡飲食乎陋巷兮亦足以

頤神而保年

閻本無食字非是

有至聖而為之依歸兮又何不

自得於艱難

何下或有苦字作顏樂亭詩其序有

東坡為膠西守孔宗翰曰昔夫子以簞食瓢

飲賢顏子而韓子乃以為哲人之細事何哉蘇子曰古之觀人也必於其小焉觀之其大者容有偽焉人能碎千金之璧不能無失聲于破釜能搏猛虎不能無變色於蜂蠆孰知簞食瓢飲之為哲人大事乎司馬溫公又曰子瞻論韓愈以在隱約而平寬為哲人之細事以為君子於人必於其小觀焉光謂韓子以三書抵宰相求官與于襄陽書求朝夕芻米僕僮之資又好悅人以誌銘而受其金其戚戚于貧賤如此烏知顏子之所為哉司馬蘇氏之論當矣雖然退之嘗荅李習之書曰孔子稱顏回一簞食一瓢飲人不堪其憂回也不改其樂彼

人者有聖者為之依歸而又有簞食瓢飲足以不死其
不憂而樂也豈不易哉若僕無所依歸無簞食瓢飲無
所取資則餓而死亦難乎而此賦又云爾蓋閔已
之不若也東坡溫國獨謂其不然要為顏子言之爾曰
余昏昏其無類兮望夫人其已遠詩小雅焦顙易林讀
遠字皆協平聲作還

字者非
夫馮無切

行舟楫而不識四方兮涉大水之漫漫勤祖

先之所貽兮勉汲汲於前修之言

騷云不量鑿而正枘
兮固前修以蘊醢注

前修前世修
名之人也

雖舉足以蹈道兮

蹈道字本穀梁傳
云蹈道則未也

哀與

我者為誰衆皆捨而已用兮忽自惑其是非下土茫茫

其廣大兮余壹不知其可懷

壹本多作豈閭杭本作壹
舊監本潮本尚作一訛壹

為豈自蜀本也檀弓云予壹不知夫喪之踊也韓語蓋原此

就水草以休息兮恒未

安而既危久拳拳其何故兮亦天命之本宜

本或作所

惟否

泰之相極兮咸一得而一違

閻本作衰非是

君子有失其所兮

小人有得其時聊固守以靜俟兮誠不及古之人兮其

馬悲

人下一無兮字馬於虔切

別知賦

公歲癸未貞元十九年冬以監察御史言旱飢得罪黜連之陽山令明年

春至邑連在唐屬湖南道時楊儀之以湖南支使來公為賦以別之集中又有序送

馬

余取友於天下將歲行之兩周

周謂十二年公自興元元年甲子以中原多故

避地江南至貞元十九年癸未凡二十年矣故云兩周

下何深之不即上何高之

不求紛擾擾其既多咸喜能而好修

好去聲紛一作作伊紛擾或作伊紛

其或作而咸一作或非是

寧安顯而獨裕顧阨窮而共愁

窮或作塞惟知

心之難得斯百一而為收

之或作而斯或作在百一或作一旦皆非是陸機嘆逝賦

得十一於千百韓用此意

歲癸未而遷逐侶蟲蛇於海陬

陬音鰕侶一或作旅

遇夫人之來使

夫音馮無切使去聲將命者

闢公館而羅羞

而或作以索

微言於亂志

前漢藝文志昔仲尼沒而微言絕注微妙之言耳

發孤笑於羣憂

物何深而不鏡一作理何隱而不抽始參差以異序卒

爛漫以同流

參差上楚簪切下楚宜切又楚佳切不齊也以或作於爛漫本或作爛漫或作瀾漫

云漫莫半切又謨官切大水也

何此歡之不可恃遂駕馬而迴輶或

作卒而或作以輶車轅也詩五

山礧礧其相軋

礧五交切一或

作樹蓊蓊其相摻

蓊蓊木茂也前漢觀衆木之蓊蓊摻絞也儀禮瘍之經者不摻垂注不絞

其帶之垂者杜詩古木龍從枝相摻

雨浪浪其不止

蓊音翁又鳥孔切

雲浩浩其常浮

江淹別賦云風蕭蕭而異響雲漫漫兮奇色公

此頗效其體

雲或作雪浩

知來者之不可以數

楚辭哀時

命篇俅者不可與期淵明歸去來辭知來者之哀去此

可追數頻也論語朋友數斯疎矣數音朔

而無由或無者字或無之字倚郭郭而掩涕空盡日以

遲留

而其

古詩

元和聖德詩

并序永貞元年八月即位明年正月改

元元和楊惠琳據夏州叛三月辛巳夏州兵

馬使周承全斬惠琳傳首以獻九月辛亥高

崇文奏收成都擒劉闢以獻十月壬午淄青

李師道十一月戊申武寧張愔皆受命二年

正月己丑朔上親獻太清宮太廟辛卯祀昊

天上帝于郊丘還宮大赦天下公時為國子

博士分教東都此詩所以作也穆伯長曰
退之元和聖德詩淮西碑柳雅章之類皆辭
嚴義偉制作如經能率然聳唐德於盛漢之
表筆墨間錄云此序乃司馬遷之文非相如
也文

臣愈頓首再拜言

此下或有曰字

臣伏見皇帝陛下即位已來

誅流姦臣

永貞元年八月庚子憲宗即位壬寅貶右散騎常侍王伾為開州司馬前戶部侍郎度支

鹽鐵轉運使王叔文為渝州司戶九月貶韓泰等為諸

州刺史十一月貶中書侍郎平章事韋執誼為崖州司

戶誅流姦臣謂此也

朝廷清明無有欺蔽外斬楊惠琳劉闢以收

夏蜀東定青徐積年之叛海內怖駭不敢違越郊天告

廟神靈歡喜風雨晦明

或作明晦

無不從順太平之期適當

今日臣蒙被恩澤日與羣臣序立紫宸殿陛下

或無陛下

親

望穆穆之光而其職業

而或作況

又在以經籍教導國子誠

宜率先作歌詩以稱道盛德不可以辭語淺薄不足以

自効為解

或作懈或作辭皆非是自左傳請以曹為解遷固相承用之非一

輒依古作

四言元和聖德詩一篇凡千有二十四字指事實錄具

載明天子文武神聖以警動百姓耳目傳示無極

警或作驚

流俗妄改也史記尊寵樂毅以警動燕齊義當用此其詩曰

皇帝即昨

或作祚史記文紀有皇帝即昨一全語實物用昨字今按昨謂東階也作祚非是

無違拒曰暘而暘曰雨而雨

尚書洪範篇八庶徵曰雨曰暘曰肅時雨若曰久時

若維是元年有盜在夏欲覆其州以踵近武

近或作其踵繼也武

迹也先是德宗建中間李希烈朱泚等反至是楊惠琳劉闢繼踵而起

馬皇帝曰嘻豈不在

我負鄙為艱縱則不可出師征之其衆十旅

十或作千方云按此

專紀楊惠琳之亂也時嚴綬在河東表請討之詔與天德軍合擊未嘗他出師也十旅為正

今按周禮五人

為伍五伍為兩四兩為卒五卒為旅則一旅五百人而十旅五千人也方說得之亦見以順討逆師不在衆之

意軍其城下告以福禍腹敗枝披不敢保聚擲首隄外

陴城上女牆左氏
衛人登陴音陴

降幡夜豎

謂象全斬
惠琳也

疆外之險莫過

蜀土韋臯去鎮劉闢守後血人于牙不肯吐口

傳言闢
嘗病見

問疾者必以手行
食之其很惡如此

人其口開輒裂
或作入

開庫啗士曰隨所取

曰方作日今按此乃述其
誘啗士卒之詞方本非是

汝張汝弓汝鼓汝鼓

上鼓字
或作伐

或作桴或作擊春秋傳云伐鼓于社
伐擊也詩采芑伐鼓淵淵振旅闕闕

汝為表書求我師

汝傳言闢守後務
諷諸將徵度節

事始上聞在列咸怒皇帝曰然嗟遠

士女苟附而安則且付與讀命於庭

讀或作
續非是

出節少府

唐百官志云符寶郎凡命將遣使
皆賜旌節旌以顯賞節以顯殺

朝發京師夕至其部

關既自為留後上初嗣位未能討是歲十
二月以關為西川節度副使知節度事
關喜謂黨汝

振而伍蜀可全有此不當受
既不當或作當不非是
關

川上萬牛鬻炙
或作肉鬻切也莊子不敢食一鬻肉與

不許
母喉炙 鬻力轉切肉之
萬甕行酒以錦纏股以紅帕

首
方云荆公本音麥潮本亦然方言註絡頭帕頭也音

作昧字蓋二音通讀
今按集韻帕莫白切無莫轄音

昧莫葛切帶也方說誤
實錄曰禹會塗山之夕大風

雷震有甲步卒千餘人其不被甲者以
有恇其兇有餌

紅綃帕抹其額自此遂為軍容之服

其誘

兇方作胃 今按此二句蓋言有畏其暴者有貪

其利者故從之者衆耳非本心樂從也方本非是

魚黃石公記曰芳餌之下必有懸其出穰穰詩降福穰

音穰隊以萬數所矩遂劫東川遂據城阻上既不許關

年正月關遂發兵圍東川節度使李康於梓州欲皇帝

以同幕盧文若為東川節度使因陷梓州降李康

曰嗟其又可許爰命崇文分卒禁禦初上欲討關而重

衆薦神策軍使高崇文可用元和元年正月命崇文將

步騎五千為前軍神策京師行營兵馬使李元奕將步

騎二千為次軍與山南西道節度使嚴礪同討關甲有

安其驅無暴我野日行三十賈捐之傳云吉行五徐壁

其右壁或開黨聚謀鹿頭是守六月關城鹿頭關連八

大崇文擊敗之關置柵於關東萬勝堆崇文遣騎將高霞寓攻奪之下瞰關城凡八戰皆捷鹿頭山南距成都

百五十崇文奉詔進退規矩作規或合戰不貪殺擒不濫數抗本

三館本文粹作藍縷唐本作襪襪蜀本始作濫數校本多從之今姑存其舊今按藍縷無理濫數益用左傳

數俘之語蜀本得之他本皆誤四方節度整兵頓馬上章請討請或侯

命起坐皇帝曰嘻無汝煩苦嘻歎辭也或荆并洎梁荆謂

荆南節度使裴均并謂河東節度使嚴綬梁謂山南西道節度使嚴礪也在國門戶出師三

千各選爾醜醜類也四軍齊作殷其如阜殷其或作殷殷

也音隱如岡如阜詩或拔其角拔或作披或脫其距距雞距史記投

石超距

欽定四庫全書

卷一

呂切長驅洋洋無有齟齬

前漢齟者齒不正也說文齟齬不相值也選或齟齬而不安

上牀呂切又壯所切下音語

八月壬午闕棄城走載妻與妾包裹稚

乳是日崇文入處其宇

日或作曰分散逐捕搜原剔藪闕窮

見窘無地自處俯視大江不見洲渚遂自顛倒若杵投

曰取之江中

九月崇文克成都闕與盧文若帥數十騎西奔吐蕃高霞寓等追之及于羊灌田闕

赴江不死擒之崇文遂入自成都

枹胷械手婦女累纍啼哭拜叩來獻

闕下以告廟社周示城市咸使觀覩解脫繫索夾以砧

斧

砧當作拈與堪同戰國策范雎曰臣之胷不足以當堪質要不足以待斧鉞是也

婉婉弱子

赤立僂僂

上音僂下音僂

牽頭曳足先斷腰脅

南軒曰誦退之聖德頌至姚姚

弱子赤立僂僂牽頭曳足先斷腰脅盧世榮舉子由之

說曰此李斯頌秦所不忍言而退之自謂無愧於風雅

何其陋也此說如何曰退之筆力高得斬截處即斬截

他豈不知此所以為此言者必有說蓋欲使藩鎮聞之

畏罪懼禍不敢叛耳今人讀之至此猶且寒心況當時

藩鎮乎此正是合於風雅處只如牆有茨桑中諸詩或

以為不必載而龜山乃曰此衛為鄰國所滅之由退之

之言亦此意也退之意過於子由遠矣大抵前輩不

可輕次及其徒體骸撐拄傳云斬于城西南獨柳樹下

以次誅說文撐袁拄也拄從旁指也古樂府未乃取關

死人骸骨相撐拄上抽庚切下豕庚切

駭汗如寫

音滑裴蕭詩用韻如此或作雨非是

揮刀紛紜爭剗膾脯

爭或作猶

刊或作切皆非是儀禮有刊肺此詩蘇黃門獨謂不然且曰此特憲宗命崇文誅一劉闢爾其言闕桑城走爭切膾脯何其瑣屑之甚謂之造語工則可謂之得雅體未也詩載文王伐崇武王伐紂固有體退之獨不到此邪亦其少年所為文也按公時年四十不可謂少大抵德不足則夸憲宗功烈固偉比文武則有間矣王荊公嘗論詩曰周頌之詞約約所以為嚴德盛故也魯頌之詞侈侈所以為夸德不足故也是詩也其亦魯頌之謂優賞將吏扶珪綴組帛堆其家粟塞其庾塞下具字或作倉非是以上哀憐陣歿廩給孤寡贈官封墓周市宏溥句偶之可見

經戰伐地寬免租簿施令酬功急疾如火

十月減劍南東西川山南

西道今歲賦釋脅從將吏葬陣亡者廩其家五歲賜文武官勲爵

天地中間莫不順序

幽恒青魏

或作魏幽恒青

東盡海浦南至徐蔡

魏謂幽州盧龍

節度恒謂成德軍節度青謂淄青平盧節度徐謂武寧軍節度蔡謂彰義軍節度

區外雜虜

區外

方外也雜虜藩鎮也按唐地理志魏州魏郡今大名府幽州范陽郡今燕山府鎮州常山縣今真定府青州北

海道也魏則田季安幽則劉濟恒則王士真青則李恒師道徐則張愔蔡則吳少誠此皆一時藩鎮之國也

威報德

諸本但作烜報作赫又作服或以文錄定烜作但

威愧德意

與此同 踧踏舞蹈棄兵革私習簞簞來請來覲十

百其耦

或作數

皇帝曰吁伯父叔舅

謂當時藩鎮諸帥也禮記曰天子之吏天

子同姓謂之伯父異姓謂之伯舅九州之 各安爾位訓

厥眊晦

眊或作田

正月元日初見宗祖躬執百禮登降拜俯

薦于新宮

新宮順宗室于或作饗新或作閼非是

視瞻梁杞感見容色淚

落入俎侍祠之臣助我惻楚乃以上辛

哀元年穀梁傳曰郊自正月至

于三月郊之時也我以十二月下辛卜正月上辛如不從則以正月下辛卜二月上辛如不從則以二月下辛

卜三月上辛如不從則不郊矣禮記郊特牲郊之于郊用辛也注云用辛曰者凡為人君當齋戒自新耳

用牡除于國南鱗筍毛簾

筍簾所以垂鐘磬也橫曰筍飾以鱗屬植曰簾飾以羸屬

周禮梓人為筍簾筍思尹廬幕周施開揭磊砢

切亦作簾籊國許切又音巨
音磊揭音謁又祭揭二
獸盾騰桴

盾以木為之而畫龍文相合載之以蔽馬

詩龍肩之合拏說文云牽引也楚詞圓壇帖安禮圓丘

丘即圓壇也賀循上郊壇制度曰漢天兵四羅旂常何

娜旂或作旗曹植曰華容何駕龍十二上為龍天子之

駕馬十魚魚雅雅字見晉史劉惔傳洛中雅雅有

宵昇于丘詞升皆作昇也楚莫壁獻竿真薦也竿玉

后氏以職商衆樂驚作轟融治轟羣車聲選轟轟聞

勻而相融治樂聲紫焰噓呵作紫或高靈下墮羣星從

坐聲從去錯落侈哆西都賦隋侯明月錯落其間說文哆

張口也詩哆兮侈兮注大貌哆丁

可切又昌者切日君月妃禮記君之與后猶日之與月前漢李尋傳曰者衆陽之宗輝光所燭萬物

同畧人君之末也唐楊炯渾天儀賦月也者煥赫嫫嫫

嫫嫫身弱好貌樂府珠佩嫫嫫戲金闕煥赫嫫嫫

謂日君嫫嫫謂月妃嫫嫫果切嫫嫫五果切嫫嫫

瀆鬼四瀆之神選濛鴻沆嶽祇業我嶽祇

業業我音我業沃羶鄉義未詳或云當沃

据也羶蘇字產祥降嘏鳳皇應奏舒翼自拊赤麟黃龍

透陀結糾麟或作鱗透或作頽卿士庶人黃童白叟

踴躍歡呀失喜噎歐歡或作嘆歐或乾清坤夷境落寨

作嘔嘔俗字也

舉

纂或作騫

帝車迴來日正當午

校本作日始東吐蓋疑郊祀回車不應至午也然諸本皆

同姑

幸丹鳳門大赦天下滌濯剡碣

詩勿剡勿取碣瓦石洗物選飛滂相碣

剡楚簡切碣初兩切又此兩切剡一作刺碣一作換

磨滅瑕垢續功臣嗣拔賢任耆

孩養無告仁滂施厚皇帝神聖通達今古

今或作先或聽

聰視明

或作視聽聰明

一似堯禹

蓋取禮記一似重有憂者魯直云退之文老杜詩無一字無來

處後人讀書少故謂韓杜自作此語耳

生知法式動得理所天錫皇帝為天

下主并包畜養無異鉅億載萬年敢有違者皇帝儉勤

盥濯陶瓦斥遣浮華好此綈紵勅戒四方侈則有欲天錫

皇帝多麥與黍無名水旱耗于雀鼠

耗于或作無耗

億載萬年有

富無窶

或作富有無窶或作富有貧窶或作無有貧窶皆非是

皇帝正直別白善石

擅命而狂既翦既去盡逐羣姦靡有遺侶天錫皇帝庀臣

碩輔博問遐觀以置左右億載萬年無敢余侮

余或作有非是

皇

帝大孝慈祥悌友怡怡愉愉奉太皇后

憲宗母昭憲皇太后王氏

決于

族親濡及九有天錫皇帝與天齊壽登茲太平無怠永久

億載萬年為父為母博士臣愈職是訓詁作為歌

詩以配吉甫

詩之嵩高烝民韓奕江漢皆尹吉甫美宣王作今為此詩亦以吉甫自比

也

琴操十首

按琴操凡十有二公取其十如下所作是也惟水僊懷陵操乃伯牙所作公削

之為之詞者十事各注于下唐子西云琴操非古詩非騷詞惟退之為得體退之琴操柳子厚

不能作也

將歸操

孔子之趙聞殺鳴犢作

史記孔子既

西見趙簡子至于河西聞竇鳴犢舜華之死也臨河而歎曰美哉水洋洋乎丘之不濟此

命也夫

按竇鳴犢孔叢子作鳴犢犢戰國策作鳴犢鐸鐸新序作犢犢鐸鐸或又作鳴

鐸鐸犢諸說不同未知孰是諸本題義下皆有子注閣本只存題義唐本注與題義皆

不出蜀本於注云上增又曰二字與題義皆
夾注寫以此見雖題義亦後人以琴操續補
也歐宋荆公皆用閣本今按歐本云此
效蔡邕作十操事跡皆出蔡邕琴操云

狄之水兮其色幽幽

狄蜀本作秋東阿荏平等縣今按水經河水至

云津西有四瀆祠東對四瀆口河水東分濟水受河蓋
榮口水斷不通始自是出與清水合沛瀆自河入濟水
徑周通故有四瀆之名昔趙殺鳴犢孔子臨河歎而作
歌曰狄之水兮風揚波舟楫顛倒更相加歸來歸來胡
為斯案臨濟故狄也是濟所逕得其通稱也又云濟水
逕臨濟縣南詳此則是濟水自榮澤之下潛流至此四
瀆津口而後復出河又東分一支與之合流以過臨濟
而為狄水故孔子臨河不濟而歌詠狄水即此東分之
河復出之濟也然此皆齊地今在濟鄆之間史記以為
孔子自衛將西見趙簡子則其道不當出此此又不可

曉者今姑闕之以俟
深于地理者正之
我將濟兮不得其由涉其淺兮石

齧我足乘其深兮龍入我舟我濟而悔兮將安歸尤歸

兮歸兮無與石鬪兮無應龍求
歸兮歸兮諸本兮作乎

倚蘭操 孔子傷不逢時作
倚蘭操者孔子所

侯莫能用自衛反魯隱谷之中見香蘭獨茂喟然歎曰夫蘭當為王者香今乃獨茂與衆

草為伍乃止車援琴鼓之自傷不逢時託辭於香蘭云古琴操云習習谷風以陰以雨

之子于歸遠送于野何彼蒼天不得其所道遙九州無有定處世人間蔽不知賢者年紀

逝邁一身將老

蘭之猗猗

班固西都賦蘭茝發色曄曄猗猗

揚揚其香不採而佩於蘭

何傷

文子曰蘭芷不為其服而不芳君子行道不為其知而止此公所為不採而佩何傷于蘭之意也

今天之旋其曷為然我行四方以日以年雪霜貿貿

禮記

貿貿然來

薺麥之茂

麥秋生夏死薺冬生中夏死西京雜記曰建亥之月陰氣之極薺麥

始生由陽升也

子如不傷我不爾覲薺麥之茂薺麥之有君子

之傷君子之守

龜山操 孔子以季桓子受齊女樂諫不從望

龜山而作

龜山魯山也詩奄有龜蒙在泰山博縣史記季氏受齊女樂三日

不聽政郊又不致燔俎於大夫孔子時為魯
大司寇遂行宿于屯而師已送曰夫子則非
罪孔子曰吾歌可夫曰彼婦之口可以出走
彼婦之詞可以死敗蓋優哉游哉維以卒歲
師已反季子曰孔子亦何言師已以實告季
氏喟然嘆曰夫子罪我以羣婢也又古操云
予欲望魯兮龜山蔽之手無斧柯奈龜
山何譬季氏於龜山託勢利於斧柯也

龜之氛兮不能雲雨

春秋元命苞曰山者氣之包舍所
舍精藏雲故觸石布山言龜山不

能然也

一作為雨氣或作

或雲上有為字

龜之枿兮

枿伐木之餘前
漢三枿之起李

巡曰枿木之餘
枿牙葛切亦作藥

不中梁柱

不下或有能字非是或云
太玄經梁不中柱不隆大

厦中作平聲讀
耳與太玄中字意異常只作去聲讀文意乃協

令按此但言其木不堪作梁柱
龜之

大兮祇以奄魯知將隳兮

知或作如將隳蓋取左氏仲尼將隳三都隳許規切

哀莫余伍周公有鬼兮嗟余歸輔

蓋言周公如有神其使余歸輔其君也

鬼或作思余歸方作歸余皆非是大抵方意尚異不問文義之如何惟作倒語者則必取之如下文我幽于家

莫爾余追皆此類也

越裳操 周公作

越裳在交趾國之南韓詩外傳曰周成王之時越裳氏重

九譯而至獻白雉於周公曰吾受命國之黃髮言曰久矣天不迅雷疾雨也海不波濤三

年于茲矣意者中國有聖人乎盍往朝之于先乃來韓本注引後漢南蠻志事同而文少

異古琴操曰於戲嗟嗟非旦之力乃文王之德

雨之施物以孳

或作滋

我何意於彼為自周之先其艱其

勤以有疆宇私我後人我祖在上四方在下厥臨孔威

敢戲以侮孰荒于門孰治于田四海既均越裳是臣

拘幽操

文王美里作

美里在河內蕩陰縣亦作牖里史記周文王

篤仁敬老禮下賢者崇侯虎譜之于紂曰將不利于帝紂囚文王美里琴錄曰文王見拘

美里憂愁無聊援琴而鼓之號曰幽拘操詞

曰殷道溷濁浸濁煩兮朱紫相合不別兮

迷亂聲色信讒言兮災災之虐使我愆兮幽

閑牢窅由其言兮遺我四人憂動勤兮美

音

目窈窕兮其凝其盲

目窈窕或作窈揜揜或作目揜揜今按下文有耳字正與目字相

對窈窕二字此之揜揜似亦差勝

耳肅肅兮聽不聞聲朝不日出兮夜

不見月與星

日上或有見字

有知無知兮為死為生嗚呼臣罪

當誅兮天王聖明

伊川曰退之作琴操有曰臣罪當誅今天王聖明道文王意中事前後之

人道不到此徐仲車言退之拘幽操謂文王囚羑里作乃云臣罪當誅今天王聖明可謂知文王之用心矣凱風七子之母猶不能安其室而云母氏聖善我無令人重自責也

岐山操 周公為太王作

岐山在岐州今有岐山縣詩居岐之陽大

王古公亶父也

孟子曰大王居豳狄人侵之事之以皮幣不得免焉云云乃屬其耆老

而告之曰狄人之所欲吾土地也我將去之
去幽踰梁山邑于岐山之下居焉此岐山操

而曰周公為大
王作思乃祖也

我家于幽

杜預云幽在新平漆縣東北今邠州是也邠與幽同或作我幽于家非是

自我先

公伊我承序敢有不同

諸本序作緒或云商書丕承基緒然國語亦有奔走承序註謂

承受事業次第也

今按序謂傳授次第漢書多云朕承天序是也緒猶言統系方引商書之言是也二字義

雖不同然用之于此似亦兩通但國語承序乃謂承受政役之次第與漢書字同而意異方作序而引以為說

則誤

今狄之人將土我疆民為我戰誰使死傷彼岐有

岵

岵與阻同楚詞漢書多用岵字今以平聲讀之非也

我往獨處爾莫余追

爾或作人

爾莫或作
莫爾非是
無思我悲

卷一

履霜操 尹吉甫子伯奇無罪為後母譖而見

逐自傷作

履霜操者尹吉甫之子伯奇所作也吉甫聽其後妻之言逐之伯奇

編水荷而衣採梲花而食清朝履霜而自傷無罪見放逐乃援琴而鼓之見古樂府題解

其詞曰朝履霜兮採晨寒考不明其心兮信讒言孤恩別離兮摧肺肝何辜皇天兮遭斯

愆痛歿不同兮恩有偏誰說碩兮知此冤

父兮兒寒母兮兒飢兒罪當咎逐兒何為兒在中野以
宿以處四無人聲誰與兒語兒寒何衣兒飢何食兒行

于野履霜以足母生衆兒有母憐之獨無母憐兒寧不

悲

兒寧或作母寧非是

雉朝飛操 牧犢子七十無妻見雉雙飛感之

而作

舊牧犢或作沐犢說齊宣王時木

吳兢樂府古題解云犢子所作也木犢子

年七十無妻出薪于野見雉雄相隨意動心怨乃仰天嘆曰聖王在上恩及草木鳥獸

而我獨不獲因援琴而歌以自傷其聲中絕崔豹古今注述其詞曰雉朝飛兮鳴相和唯

雄羣遊於山阿我獨何命兮未有家時將暮兮可奈何嗟嗟暮兮可奈何

雉之飛于朝日羣雌孤雄意氣橫出

或無氣字

當東而西當

啄而飛隨飛隨啄羣雌粥粥

粥粥或謂字當作用音祝說文呼雞重言之杜詩雞話用雞翁

嗟我雖人曾不如彼雉雞生身七十年無一妻與妃

馬大年云

別本彼作此無雞字而
下語妃音嬌與雉協

別鵠操 商陵穆子娶妻五年無子父母欲其

改娶其妻聞之中夜悲嘯穆子感之而作

崔豹

古今注曰商陵牧子娶妻五年無子父兄欲其改娶妻聞之中夜起倚戶而悲嘯穆子聞

之愴然而悲乃援琴而歌為別鵠操亦曰別鵠操詞曰將乖比翼隔天端山川悠遠路漫

漫攬衾不寐食忘
飡後遂為夫妻

雄鵲銜枝來雌鵲啄泥歸集成不生子大義當乖離江
漢水之大鵲身鳥之微更無相逢日且可繞樹相隨飛
且或作安又無繞樹二字皆非是李陵詩長當為此別
且復立斯須又古樂府與子如黃鵠將別復徘徊亦此
也意

殘形操 曾子夢見一狸不見其首作

殘形操
事出琴

錄其詳未聞曾
子一作魯子

有獸維狸兮我夢得之其身孔明兮而頭不知

按大周
正樂記

曾子鼓琴崔子立戶外而聽之曲終入曰善哉鼓琴乎
身已成矣而惜未得其首也曾子曰吾畫臥夢見一狸

但見其身不見其頭
起而為之絃歌也

吉凶何為今覺坐而思巫咸上天

今

古神巫也

識者其誰

南山詩

或無詩字

此詩似上林子虛賦才力

謂老杜北征勝北征終不能相服時山谷尚少乃曰若

論工巧則北征不及南山若書一代之事以

山雖不作未害也二公之論遂定按

長安志終南山在萬年縣南五十里

吾聞京城南茲惟羣山圓東西兩際海

方云史記春申君上秦昭王書

水之地一

經兩海太康地記曰河北得水為河塞外得

水為海

今按此與史記但皆極言其廣耳不必曲引

塞外之說也 巨細難悉究山經及地志茫昧非受授團辭試

提挈挂一念萬漏挂一念或作一念挂非是欲休諒不能粗叙所經

覲嘗昇崇丘望嘗或作常戢戢見相湊清明出稜角縷脈碎

分繡蒸嵐相瀕洞瀕或作鴻淮南子瀕濛鴻洞王褒蕭賦揚雄羽獵賦所用皆同唐人始魚

用之杜詩鴻洞半炎方瀕洞不可擬是也表裏忽通透無風自飄簸融液煦

桑茂橫雲時平凝點點露數岫天空浮脩眉選洛神賦脩眉聯娟

空或作宇濃綠畫新就孤撐有巉絕杜詩巉絕華岳赤南史劉孝標廣絕交論太行

孟門豈云巉絕海浴褰鵬噉史記中行入面鳥噉音

槩春陽潛沮洳

沮洳陷濕地詩彼汾沮洳沮洳猶言潤澤也沮子魚切洳音如又一音皆去

聲

濯濯吐深秀

吐深或作深吐

巖巖雖律萃

史記隆崇律萃杜詩高岳前律萃

律音律萃昨沒切又慈卹切

輒弱類舍耐

輒與軟同而宛切耐音宙

夏炎百木盛

陰鬱增埋覆神靈日歆歆

歆音朽歆休居切

雲氣爭結構秋霜

喜刻轢

或作鑠史記酷吏傳刻轢宗室

磔卓立癯瘦

磔音窄

參差相疊重

剛耿陵宇宙冬行雖幽墨冰雪工琢鏤

雪或作路新曦照危

峨億丈恒高袤

東西曰廣南北曰袤前漢延袤百丈莫候切危或作危恒居卹切或作互明

昏無停態頃刻異狀候

已上叙四時變態

西南雄太白突起莫

開造

左傳信子使助蓮氏之蓮注蓮副倅也嵇康曰承開蓮乏蓮初救切

藩都配德運

太白山為帝都藩垣唐土德太白在西南坤位故云配德運

分宅占丁戊

丁戊亦謂西南西字

恐當逍遙越坤位

逍遙谷名地詆訐陷乾竇

言太白非特占西南坤位

而已

按藩都至乾竇四句未詳其義空虛寒兢兢風氣

較搜漱朱維方燒日陰霰縱騰糅

如救切

昆明大池北

昆明

池在長安西南周四四十里去覲偶晴晝繇聯窮俯視

倒側困清漚

烏候切

微瀾動水面踊躍躁猱

猱猴屬詩無教猱升

木狢鼠屬善旋一云獸名似猱楚詞猱狢雜處兮虎豹嘽

猱奴刀切狢音柚躁一作躁驚呼惜破

碎仰喜呀不仆

已上言南山方隅連亘之所

前尋徑杜墅全蔽畢原

陋

徑或作經當如夜徑澤中之徑杜或作杜非是杜墅即杜陵也本周之杜伯國在長安萬年縣東南全或

作忿畢原周文武葬處在今咸陽縣西北或曰文王子封于畢此其地也

崎嶇上軒

昂始得觀覽富行行將遂窮嶺陸煩互走

音奏

勃然思圻

裂擁掩難恕宥巨靈與夸蛾

西京賦巨靈翺順高掌遠蹠郭緣生述征記曰華山

對河東首陽山黃河流于二山之間古語云此本一山當河河水過之而曲行河神巨靈以手擘開其上以足踏離其下中分為兩以通河流蛾或作蛾考列子北山愚公欲平太行王屋二山帝感其誠命夸蛾氏二子負二山一厝朔東一厝雍南自冀之南漢之遠賈期必售或求無隴斷焉則娥當作蛾夸苦瓜切

作佳詩賈用不還疑造物意固護蓄精祐力雖能排幹
售賈音古

雷電怯呵詬攀緣脫手足踰蹬抵積甃茫如試矯首塢

塞生恟愁塢音幅王塊也爾雅云塊塢也楚詞宋玉九
辨云直恟替而自若音寇茂按集韻通作

蔽霽鄙吝威容喪蕭爽近新迷遠舊拘官計日月欲進
心不明也

不可又因緣窺其湫凝湛閤陰罟禮運龍以為罟謂湫
中蛟也罟音噢亦

作畜或魚蝦可俯掇神物安敢寇林柯有脫葉欲墮鳥
作獸

驚救爭銜彎環飛投棄急哺鷩鷩生須哺曰鷩自食曰
鷩爾雅生哺鷩生鷩雛

音寇旋歸道迴睨達枿壯復奏達或作遠盧仝月蝕吁
詩頭戴弁冠高遠枿吁

嗟信奇怪峙質能化質

音茂

前年遭遣謫

謂貞元十九年十二月自監察

御史謫連州陽山令

探歷得邂逅初從藍田入

藍田縣名今在雍州有關

顧眄

勞頸脰

公羊傳絕其脰音豆

時天晦大雪

公兩謫南方皆由藍田又皆遇冰雪其謫陽山

以十二月江陵途中寄三學士詩云商山冬季月冰凍絕行輟其謫潮州雖以正月然亦遇雪藍田驛詩云雪

擁藍關馬不前是也

淚目苦朦朧

莊子子適有瞽病注風眩冒亂

瞽音茂

峻塗拖長

冰直上若懸溜褰衣步推馬

推音雅

顛蹶退且復

扶富切

蒼

黃忘遐睎所矚纔左右杉篁咬蒲蘇

咬音婉

果耀攢介冑

專心憶平道脫險逾避臭

逾或作通非是

昨來逢清霽宿願忻

始副

始或作所非是自前年

崢嶸躋冢頂

崢音張嶸音宏

修

閃雜鼪鼯

爾雅云鼪鼯夷由注謂之飛生又曰鼪鼯注鼪似鼫赤黃色大尾啖鼠鼪音吾鼯音又

前低劃開闊

劃音畫又忽麥切

爛漫堆衆皴

本方從蜀人韓仲韶本作皴云石皴也

二韻皆取喻謂高而羣峯飛馳今按此蜀本之誤沈元分布如衆皴之列於義為近

用本亦然皆非是蓋此但言登山之時叢薄蔽翳方與蟲獸羣行而忽至上頂則豁然見前山之低雖有高陵

深谷但如皴物微有感摺之文耳此最為善形容者非登高山臨曠野不知此語之為工也況此句衆皴為下

文諸或之綱領而諸或乃衆皴之條目其語意接連文勢開闔有不可以豪釐差者若如方說則不唯失其統

紀亂其行列而鼪鼯動物山體常靜絕無相似之理石皴之與堆阜雖略相似然自高頂下視猶若成堆則亦

不為甚小而未足見南山之極高矣但其與下文諸或疎密工拙又有迥然不侔者未論古人但使今時舉子稍能布置者已不為此又況韓子文氣筆力之盛闕鍵紀律之嚴乎大抵今人於公之文知其力去陳言之為工而不知其文從字順之為貴故其好怪失常類多或連如此今既定從諸本而復備論其說以曉觀者云

若相從或麇若相鬪或妥若弭伏或竦若驚雛或散若

瓦解或赴若輻湊輻或作輪今按輪者轂輻之通或

翩若船遊翩或作泛或決若馬驟或背若相惡或向若相佑

或亂若抽筍或嶮若注矢嶮音臬灸音疚或錯若繪畫或繚

若篆籀或羅若星離或翥若雲逗或浮若波濤或碎若

鋤耨或如賁育倫

賁育孟賁秦之勇力者賁音奔

賭勝勇前購先強勢

已出後鈍嗔誼孺

玉篇誼講話說也

上音闕下音耨

或如帝王

尊叢集朝賤幼雖親不褻狎雖遠不悖謬

鬼說之語錄云韓文公詩

號狀體謂鋪叙而無含蓄也若雖親不褻狎雖遠不悖謬該于理多矣

或如臨食案有核

紛釘餌

紛或作分

又如遊九原墳墓包槨柩或纍若盆罌或

揭若瓊桓

或作登豆

或覆若曝覽或頽若寢獸

寢或作窮非是又或作偃

或蛻若藏龍或翼若搏鷲

音就

或齊若友朋或隨若先後

友朋或作迎隨隨或作差方言曰先後猶娣姒也釋名曰以來先後言也校本不詳此義而以先後為虛字遂

改友朋為迎隨以偶之又避重複而改隨字為差字其誤甚矣今按史記見神於先後死若即謂娣姒也

或迸若流落或顧若宿留

史記宿留之數日無所見又武帝宿留海上宿音秀留

雷音或戾若仇讎或密若婚媾或儼若峨冠或翾若舞袖

舞或作舉或屹若戰陣或圍若蒐狩或靡然東注或偃然北

首或如火熺焰

煙或作

或若氣饋餽

爾雅云餽稔也注饗飯為饋饋熟為餽

上音分又扶文切下音溜或行而不輟或遺而不收

易井收勿幕音狩

或斜

而不倚或弛而不毅或赤若禿鬣

鬣說文云鬣禿也丘閑切

或燠若

柴槩

余救切

或如龜坼兆或若卦分繇

音宙

或前橫若剝

易剝

三坤下艮上或後斷若姤易姤三巽下乾延延離又屬

夫夫叛還邁喁喁魚闕萍

喁喁魚口也吳越春秋云天

之則闕然注出頭貌落落月經宿閭閭樹牆垣嘽嘽架

庫殿

嘽山形如甑也姚令威云恐參參削劍戟煥煥銜

瑩琇

上音營下音秀數數花披萼闕闕屋摧雷闕闕或作闕悠

悠舒而安兀兀狂以狃超超出猶奔蠹蠹駭不懋已上

其經歷所見之狀大哉立天地經紀肖營腴厥初孰開張僬僥

誰勸侑創茲朴而巧戮力忍勞疚得非施斧斤無乃假

詛呪鴻荒竟無傳功大莫酬

無或作誰又作莫莫或作豈

嘗聞於

祠官芬必降歆

或作獻依字當作獻

斐然作歌詩惟用贊報

音又 是詩凡百有二韻始總敘四時之變次敘南山連亘之所止其末則敘其經歷之所見焉

謝自然詩

果州謝真人上丹在金泉山貞元十年十一月十二日辰時白晝輕舉時

郡守李堅以聞上賜詔褒諭謂所部之中靈仙表異元風益振至道彌彰其詔今尚有石

刻在馬公排釋老斥異端故詩有所不取

果州南充縣寒女謝自然童騃無所識

騃癡愚也

但聞有神

仙輕生學其術乃在金泉山繁華榮慕絕父母慈愛捐

凝心感魑魅

上抽
下明

知切
秘切

恍惚難具言

慌音
恍惚
呼骨切

一朝坐

空室雲霧生其間如聆笙竽韻來自冥冥天白日變幽

晦蕭蕭風景寒簷楹
曄明滅

變或
作氣

五色光屬聯觀者徒

傾駭躑躅詎敢前

躑躅不進貌楚詞待天明兮立躑躅
鮑昭行路難云吞聲躑躅不敢言

上直炙切
下厨玉切須臾自輕舉飄若風中煙茫茫八紘大

淮南
子九

州之外有八紘八紘之外有八紘
八紘九野之水注八極也

八紘列子
絃音宏

影響無由緣里

胥上其事郡守驚且歎

或作觀
或作歡

驅車領官吏吐俗爭相

先入門無所見冠屨同蛻蟬

楚詞濟江海兮蛻蟬夏侯
湛作東方朔畫贊曰蟬蛻

龍變棄俗
登仙音稅

皆云神仙事灼灼信可傳余聞古夏后象物

知神姦山林民可入

民或作人公文石本用民字魍魎

莫逢旃

左傳宣公三年楚子問鼎之大小輕重王孫滿對曰在德不在鼎昔夏之方有德也云云鑄鼎

象物而為之備使民知神姦故民入川澤山林魍魎魍魎莫能逢之此曰莫逢旃旃之也選西京賦魍魎魍魎

莫能逢旃逶迤不復振後世恣欺謾幽明紛雜亂人鬼更相

殘秦皇雖篤好漢武洪其源自從二主來此禍竟連連

莊駢拇篇又吳連連如膠漆纏糾

木石生怪變狐狸騁妖患莫能盡性

命安得更長延

盡或作保嵇康養生論導養得理以盡性命

人生處萬類知

識最為賢奈何不自信反欲從物遷

書君陳曰惟民往
生厚因物有遷

者不可悔孤魂抱深冤來者猶可誠余言豈空文

空或
作虛

人生有常理男女各有倫寒衣及飢食在紡績耕耘

或

作

下以保子孫上以奉君親苟異於此道皆為棄其身

噫乎彼寒女永託異物羣感傷遂成詩

或作
詠

昧者宜書

紳

秋懷詩十一首

秋懷詩十一首文選詩體也唐
人最重文選學公以六經之文

為諸儒唱文選弗論也獨於李邕墓誌之曰
能暗記論語尚書毛詩左氏文選而公詩如

自許連城價傍砌看紅藥眼穿長訝雙魚斷
之句皆取諸文選故此詩往往有其體多自
感其趨尚不與世合故末章有避語弄觸心
兵之句繼又以霜菊自歎可見一時直道之
不容也

牕前兩好樹衆葉光薿薿

詩黍稷薿薿

秋風一披拂策策鳴

不已微燈照空牀夜半偏入耳愁憂無端來感歎成坐

起天明視顏色與故不相似羲和驅日月

或作白日廣雅云羲和日

御也杜詩云羲和鞭白日

疾急不可恃浮生雖多塗

雖或作每

趨死惟一

軌胡為浪自苦得酒且歡喜

白露下百草蕭蘭共雕悴

雕或作憔悴荀子勞苦雕悴

青青四牆

下已復生滿地

後山詩牆根霜下草又作一番新意本于此

寒蟬暫寂寞蟋

蟀鳴自恣運行無窮期稟受氣苦異適時各得所松柏

不必貴

彼時何卒卒

孟子卒然問曰音蒼沒切前漢司馬相如傳卒卒無須臾之間顏師古曰卒卒促遽

之意

我志何曼曼

音萬

犀首空好飲

史記犀首者魏人也名衍姓公孫氏司馬

彪曰犀首魏官名楚使陳軫使秦過梁見之曰公何好飲也曰無事也

廉頗尚能飯

廉頗趙將

以譏奔魏其後趙王使使者視頗尚可用否頗為之一飯斗米肉十斤被甲上馬以示可用使者還報曰廉將

軍雖老學堂日無事驅馬適所願茫茫出門路欲去聊尚善飯

自勸或作歎歸還閱書史或作簡書文字浩千萬陳跡竟誰尋

陳或作塵莊子六經者或作難賤嗜非貴獻負日之暄而欲獻君食芹之美而欲

進御貴賤固有差矣詩意大丈夫意有在或作存女子乃抵以其所嗜不與時偶焉

多怨

秋氣日惻惻秋空日凌凌上無枝上蜩蜩大蟬也詩五月鳴蜩音條

下無盤中蠅豈不感時節耳目去所憎去或作無清曉卷書

坐南山見高稜其下澄湫水澄或作通或作有有蛟寒或作古或作石

可曾惜哉不得往豈謂吾無能

離離掛空悲感感抱虛警露泣秋樹高

泣或作滴或作啼或作泣謝靈

運詩花上露猶泣謝惠連泣露盈條

王僧達詩秋還露泣柯古詩於露用泣字非一

今按檀弓孔子泣然

流涕則泣為流涕之貌

于下句蟲弔對偶尤切蟲弔寒夜永斂退就新懦趨營

悼前猛歸愚識夷塗

愚或作儒

汲古得脩綆

綆繩也左氏具綆缶注汲索荀

子短綆不可以汲深井之泉音梗

名浮猶有恥味薄真自幸庶幾遺悔

尤即此是幽屏

選張衡曰雜挿幽屏屏必郢切葛立方曰此則陶潛歸去來辭覺今是昨非

之意似有所悟也

今晨不成起端坐盡日景蟲鳴室幽幽

方作幽室中
今按當作室幽

幽乃與下
句相偶

月吐牕罔罔

吐一作照
罔音憬

喪懷若迷方浮念劇

舍梗塵埃慵伺候文字浪馳騁尚須勉其頑王事有朝

請

前漢吳王濞使人為秋請
孟康曰律春曰朝秋曰請

秋夜不可晨秋日苦易暗我無汲汲志何以有此憾寒

雞空在棲缺月煩屢瞰

苦濫切

有琴具徽絃再鼓聽愈淡

古聲久埋滅無由見真濫

禮記古樂和正以
廣新樂姦聲以濫

低心逐時

趨

低或作吾蓋草書
之誤而失其半

苦勉祇能暫有如乘風船一縱不

可纜不如觀文字

後山詩云早年著眼觀文丹鉛事點字蓋倣公語

勘選范始興

立太宰碑表人蓄油素家懷鉛筆注鉛粉筆也王充論衡揚雄采集異國珠語常把三寸弱翰

齋油素四尺

以問其豈必求贏餘所要石與甌甌小甌也齊東

異語以鉛摘之

於槩

北海岱之間謂之甌西漢揚雄傳家無甌石之儲列子狀若甌甌都濫切甌通作儋儋通傳守儋石之祿

卷卷落地葉隨風走前軒鳴聲若有意顛倒相追奔空

堂黃昏暮我坐默不言童子自外至吹燈當我前問我

我不應饋我我不餐退坐西壁下

坐或作下讀詩盡數編作

者非今士相去時已千其言有感觸使我復悽酸顧謂

金夕
汝童子置書且安眠丈夫屬有念

夫或作人本亦作人說者謂夫

人者尊長之稱古樂府所謂大人且安坐是也此為答童子而自稱故其言如此更詳之事業無窮

年

霜風侵梧桐衆葉著樹乾空堦一片下瑀若摧琅玕

或瑀

作瑀謂是夜氣減望舒實其團

淮南子月御曰望舒離騷前望舒使先驅實墜也公

早夜中星實如雨張載曰望舒四五團

聲瑀然誤謂望舒之實其團也實于敏切青冥無依

倚飛轍危難安驚起出戶視倚楹久沈瀾

選歐陽堅石詩揮筆涕洟

瀾注涕洟貌也沈音丸

憂愁費晷景日月如跳丸

莊子東西跳梁杜牧之詩日月

兩跳丸取此意也

迷復不計遠

計或作記

為君駐塵鞍

暮暗來客去羣蹕各收聲悠悠偃宵寂疊疊抱秋明世

累忽進慮

進或作連

外憂遂侵誠強懷張不滿弱念缺已盈

已或作易詰屈避語寔冥茫觸心兵敗虞千金棄

莊子林回棄千金之

壁負赤子而趨或曰為其布與赤子之布寡矣為其累與赤子之累多矣棄千金之壁負赤子而趨何也林回曰彼以利合此以天屬也夫以利合者迫窮禍患害相棄也以天屬者迫窮禍患害相報也得比寸

草榮知恥足為勇晏然誰汝令

誰一作惟

鮮鮮霜中菊既晚何用好揚揚弄芳蝶

揚揚或作陽陽

爾生還

不早

東坡詩云勿訝昌黎恨爾生不早謂此語也

運窮兩值遇婉孌死相保

詩婉孌兮變兮注婉少貌變

好貌上音宛下力充切

西風蟄龍蛇衆木日凋槁由

來命分爾泯滅豈足道

赴江陵途中寄贈王二十補闕李十一拾遺李

二十六員外翰林三學士

或作寄三學士題下注王二十補闕

李十一拾遺李二十六員外

蜀本無翰林字

王二十補闕名涯李十一拾遺名建李二

十六員外名程按公傳自四門博士轉監察御史上章數千言極論宮市德宗怒貶為陽

山令量移江陵府法曹參軍唯皇甫持正神道碑云貞元十九年闕中旱飢公列言天下

根本專政者惡之出為陽山令則非為言官
市出也故公此詩自陽山赴江陵因詩序其

得罪之由端坐言早飢則與持
正之言合詩永貞元年秋作

孤臣昔放逐血泣追愆尤

血泣或作泣或作血泣汗漫不省識淮南

于徙倚于汗漫之字注汗漫無生形又曰吾與汗漫期于九垓之外注汗漫不可知也汗音捍漫音慢

恍如乘桴浮

恍音晃

或自疑上疏上疏豈其由

或云自疑當作疑自

謂疑由上疏也故下文云上疏豈其由也

是年京師旱田畝少所收上憐

民無食征賦半已休

征或作兵

有司恤經費未免煩徵求富

者既云急貧者固已流傳聞閭里間赤子棄渠溝持男

易斗粟掉臂莫肯酬

史記馮諼曰朝趨市者平旦側肩爭門而入日暮之後掉臂不顧所

期物忘其中

我時出衢路餓者何其稠

其或

親逢道邊

死

方云閭本作道邊死而從杭蜀作道死者人謂尸為死左傳生拘石乞而問白公之死漢書何

今按古

處求子死且古語又有直如弦死道邊之說韓公佇立蓋魚用之此乃閭本之善而方反不從殊不可曉佇立

久呶呶

上音伊下音憂佇立或作停馬

歸舍不能食有如魚中鉤

中或作挂

或從蜀本作出云選文賦若遊魚銜鉤而出重淵之深公語原此今按韓公未必用選語況其語乃魚出淵

非魚出鉤也不若作挂為近然第五卷送劉師服詩有魚中鉤之語則此出字乃是中字之誤而尚存其彷彿

耳今定作中

適會除御史誠當得言秋拜疏移閣門為

讀作去聲

忠寧自謀上陳人疾苦無令絕其喉或作下陳畿甸內

陳或作言根本理宜優積雪驗豐熟幸寬待蠶桑天子

惻然感司空歎綢繆杜佑檢校司空同中書門下平章事謂

言即施設乃反遷炎州反或作返州本又同官盡才俊

偏善柳與劉柳宗元劉夢得時或慮語言洩傳之落窻

讎二子不宜爾將疑斷還不蔡寬夫詩話云退之陽山

文韋執誼等所排耳子厚禹錫子退之最善然至是不

能無疑故云同官盡才俊偏善柳與劉云云苦溪漁隱

曰余閱洪氏年譜然後知寬夫為誤年譜云貞元十九

年公與張署李方叔上疏言關中民急為幸臣所讒幸

東雅堂集卷注

四十

臣者李實也祝曰不者未定之中使臨門遣頃刻不得
辭前漢知捕免不方鳩切

留病妹臥牀褥妹或作妹分知隔明幽悲啼乞就別百請不

領頭領點頭也後漢操領之戶感切弱妻抱稚子出拜忘慙羞僂僂不

迴顧行行詣連州朝為青雲士暮作白首囚商山季冬

月冰凍絕行轉春風洞庭浪出沒驚孤舟逾嶺到所任

低顏奉君侯酸寒何足道隨事生瘡疣遠地觸途異吏

民似猿猴生獐多忿很獐尼耕切惡犬也很下壑切辭舌紛嘲啁禮記

小者至於燕雀猶有啁噍之項馬嘲涉交切啁張留切白日屋簷下雙鳴鷗鷗鷗

江東呼為鷓鴣嶺表錄異鷓鴣即鷓也又曰訓狐鷓鴣尤切鷓鴣力求切有蛇類兩首有蟲

羣飛游

蟲或作蟲鮑明遠詩吹蟲病行暉李善曰吹蟲飛蟲也

窮冬或搖扇盛夏

或重裘颶起最可畏

嶺南錄異云嶺嶠夏秋雄風曰颶颶音具

旬哮簸陵

丘

荀音轟哮虛交切

雷霆助光怪氣象難比倖癘疫忽潛遁十

家無一瘳猜嫌動置毒對案輒懷愁前日遇恩赦

貞元二十

一年正月乙巳順宗即位二月私心喜還憂

公集又有詩云伍文

甲子大赦天下公量移江陵掾私心喜還憂詩云伍文未揃崖州職雖得赦果然又羈繫不得歸勸穰此府雄

有常愁猜意與此類且大騰凌盡戈矛棲棲法曹掾何處事卑陬生平企仁

東漢楊賜為
廷尉自以世

非法家書曰乃命三后卹功于民伯夷禹稷三君耳士
卑陶不在焉蓋吝之也筆墨間錄曰此等語可謂怨誹

犴亦獄也漢書義曰鄉亭獄曰犴揚
 子狴犴使人多禮乎詩宜岸宜獄犴

兔宜網罟

湘水清且急涼風日脩脩胡為

作者
日或

赫然下明詔首罪誅

二人之罪如共工驩兜也

復聞顛天輩

謂當時杜黃裳鄭餘慶之徒為相峨冠進

鴻疇

鴻大也疇謀也

班行再肅穆璜珮鳴琅璆

周禮以璜璆

北方璜半璧也書厥貢

佇繼貞觀烈邊封脫兜鍪三賢

推侍從

三賢即涯建程也

卓犖傾枚鄒

選聖賢卓犖左思曰卓犖觀羣書枚謂枚乘鄒

謂鄒陽聲呂角切

高議參造化

或作物非是

清文煥皇猷協心輔齊

聖政理同毛輶

理治也唐人避高宗諱故治字皆作理詩德輶如毛

小雅詠鳴鹿

食苹貴呦呦

詩呦呦鹿鳴食野之苹苹萍也

遺風邈不嗣豈憶嘗同禰

嘗或作常禰與疇同或作傳或作稠皆非是詩抱衾與禰注云禰禰被也同禰者取詩同袍之義

矢志

早衰換前期擬蜉蝣自從齒牙缺始慕舌為桑

淮南子曰老子

學商容見舌而知桑注云商吐舌示老子老子知舌桑齒剛劉向說此常擬有疾老子往問焉張其口而示老

子曰吾舌存乎老子曰然吾齒存乎老子曰亡子知之乎老子曰舌之存也豈非以其桑乎夫齒之亡也豈非

以其剛乎曰嘻是已因疾鼻又塞漸能等薰蕕薰香草蕕臭草左僖四年一薰一蕕

十年尚猶有臭詩意謂不分善惡也深思罷官去畢命依松楸空懷焉能

果但見歲已邁殷湯閔禽獸解網祝蛛蝥

賈誼新書湯見設網者四

面乃去雷煥掘寶劍冤氛銷斗牛

氛或作氣晉書吳之未滅也斗牛之間常

有紫氣張華以雷煥為豐城令使尋之煥至縣掘獄屋基入地四尺餘得一石函中有雙劍並有題刻一曰龍

泉一曰太阿其夕
斗牛間氣不復見
茲道誠可尚誰能
借前籌殷勤謝吾

友

吾或作朋

明月非暗投

鄒陽書曰明月之珠夜光之璧以暗投人於道衆莫不按劍相眄者

無因而至前也公意以湯譬憲宗以劍譬已以借前籌屬三賢者明月之珠非投暗矣

暮行河堤上

暮行河堤上四顧不見人
衰草際黃雲感歎愁我神
夜歸孤舟臥展轉空及晨
謀計竟何就嗟嗟世與身

夜歌

此歌及前暮行河堤上詩皆作於德宗貞元中時彊藩悍將可為朝廷憂公方歎計

謀之未就雖欲憂之非所力也

靜夜有清光閒堂仍獨息念身幸無恨志氣方自得樂
哉何所憂所憂非我力或作可悲

重雲李觀疾贈之

觀字元賓隴西人與公同舉貞元八年進士以十年死於

京師當其疾時以詩贈云

天行失其度

方作天行令失度云公詩語多用此一體今按諸本皆作天行失其度文意自通

公詩雖間有如此方說者然亦不專以此為奇也陰氣來干陽重雲閉白日或作夜

非是炎燠成寒涼小人但咨怨君子惟憂傷飲食為減少

或作尚為身體豈寧康此志誠足貴懼非職所當職或作識

張衡同聲歌

賤妾職所當

如此

肉食安可嘗

左氏莊十年肉

食者鄙未能遠謀

窮冬百草死幽桂乃芬芳且況天地間大運

自有常勸君善飲食鸞鳳本高翔

江漢答孟郊

江漢雖云廣乘舟渡無艱

或作難

沅沙信難行馬足常往

還淒風結衝波孤裘能禦寒終宵處幽室華燭光爛爛

或作夾夾楚詞爛字叶平聲九章曰曾枝剡棘圓果搏兮青黃雜揉文章爛兮

或行

存可以居夷蠻嗟余與夫子此義每所敦何為復見贈

繾綣在不諼

繾音遣繾苦遠切諼音喧繾繾不相離貌詩以謹繾繾

長安交遊者贈孟郊

長安交遊者馬厭穀出門其意大率相類皆公未得

志之所為也

長安交遊者貧富各有徒親朋相過時

過或作遇亦各有以

娛

或作亦有以歡娛

陋室有文史高門有笙竽何能辨榮悴且

欲分賢愚

岐山下二首

諸本只作一首自日暮邊火驚以上為第一篇世有淮畦暇語一書

謂子齊初應舉韓公賞之為作丹穴五色羽子齊姓程字昔範嘗著中謔三卷見因話錄

則下詩似當為別篇第前詩題以岐山下此
必遊鳳翔日作然四語亦不成篇此詩載之

卷末疑
有脫誤

誰謂我有耳不聞鳳皇鳴
竭來岐山下
前漢四車竭來

去謁日暮邊鴻驚
鴻或作火
不聞鳳鳴則此當作鴻
丹穴五色

羽其名為鳳皇
山海經丹穴之山有鳥狀如鶴五色而
文名曰鳳是鳥也見則天下大安寧

昔周有盛德此鳥鳴高岡
詩卷阿鳳凰鳴
矣子彼高岡和聲隨祥風

宵窈相飄揚
宵窈或作宵窈或作窈窈或又作宵窈而
舉正改窈為窈按宵即窈字既連用之不

應異體或是宵字一作窈
聞者亦何事但知時俗康自

從公旦死

公或作姬


千載閱其光

即杜子美鳳凰臺詩所謂西伯今寂寞鳳聲亦悠悠

也

吾君亦勤理遲爾一來翔

易遲歸有時漢書側席遲士遲待也音穉



東雅堂昌黎集註卷一